



ერთი მხრივ, საქართველოსა და, მეორე მხრივ, ევროკავშირს და
ევროპის ატომური ენერჯის გაერთიანებას და მათ წევრ
სახელმწიფოებს შორის ასოცირების შეთანხმებისა და
საქართველოსა და ევროკავშირს შორის ასოცირების დღის
წესრიგის განხორციელების

**2019 წლის ეროვნული სამოქმედო გეგმის შესრულების
ექვსი თვის (იანვარი-ივნისი)
ანგარიში**

სექტემბერი

2019

სარჩევი

1.	ზოგადი მიმოხილვა.....	3
2.	პოლიტიკური დიალოგი და რეფორმა, თანამშრომლობა საგარეო და უსაფრთხოების პოლიტიკის სფეროში	4
3.	თავისუფლება, უსაფრთხოება და მართლმსაჯულება.....	13
4.	ვაჭრობა და ვაჭრობასთან დაკავშირებული საკითხები	17
5.	ეკონომიკური თანამშრომლობა.....	21
6.	თანამშრომლობა სხვა სფეროებში.....	24
7.	ფინანსური დახმარება, თაღლითობის წინააღმდეგ ბრძოლა და კონტროლი.....	38
8.	ინსტიტუციური თანამშრომლობა.....	39

1. ზოგადი მიმოხილვა

ანგარიშში წარმოდგენილია ინფორმაცია, ერთი მხრივ, საქართველოსა და, მეორე მხრივ, ევროკავშირს და ევროპის ატომური ენერჯის გაერთიანებას და მათ წევრ სახელმწიფოებს შორის ასოცირების შესახებ შეთანხმებისა და საქართველოსა და ევროკავშირს შორის ასოცირების დღის წესრიგის განხორციელების 2019 წლის ეროვნული სამოქმედო გეგმის შესრულების შესახებ. წინამდებარე ანგარიში მოიცავს 2019 წლის პირველი იანვრიდან 2019 წლის 30 ივნისის ჩათვლით პერიოდს.¹

2019 წლის პირველ ნახევარში ასოცირების შესახებ შეთანხმებისა და ასოცირების დღის წესრიგის განხორციელების ხელშეწყობისა და საქართველოს ევროკავშირში ინტეგრაციის პროცესის ეფექტიანი კოორდინაციის მიზნით, საქართველოს პრემიერ-მინისტრის თავმჯდომარეობით გაიმართა საქართველოს ევროკავშირში ინტეგრაციის კომისიის ერთი სხდომა.

შემუშავდა საქართველოს ევროკავშირში ინტეგრაციის საგზაო რუკა (RoadMap2EU), რომელიც მოწონებულ იქნა 1 მარტს გამართულ საქართველოს ევროკავშირში ინტეგრაციის კომისიის სხდომაზე და წარდგენილ იქნა 5 მარტს, ქ. ბრიუსელში გამართულ ასოცირების საბჭოს სხდომაზე, რომელსაც საქართველოს მხრიდან თავმჯდომარეობდა საქართველოს პრემიერ-მინისტრი, ხოლო ევროპული მხრიდან ევროკომისიის პრეზიდენტი.

2019 წლის სამოქმედო გეგმასა და მისი შესრულების 6 თვის ანგარიშში გათვალისწინებულია საგზაო რუკაში გაწერილი ძირითადი მიზნები და ამოცანები; ამასთან, საანგარიშო პერიოდში დაწყებულია მუშაობა აღნიშნული დოკუმენტით განსაზღვრული სამომავლო გეგმების შესრულებაზე.

საქართველოს კანონმდებლობის ევროკავშირის კანონმდებლობასთან აპროქსიმაციის მიზნით, საანგარიშო პერიოდში საქართველოს პარლამენტმა მიიღო საქართველოს ორგანული კანონი „შრომის უსაფრთხოების შესახებ“ (19.02.19), საქართველოს ახალი საბაჟო კოდექსი (28.06.19) და საკანონმდებლო ცვლილებები „საქართველოს შრომის კოდექსში“ (ორგანულ კანონში) (19.02.19), „საქართველოს კანონში დისკრიმინაციის ყველა ფორმის აღმოფხვრის შესახებ“ (19.02.19), „საქართველოს კანონში საჯარო სამსახურის შესახებ“ (19.02.19), „საქართველოს კანონში გენდერული თანასწორობის შესახებ“ (19.02.19), „საქართველოს საჰაერო კოდექსში“ (22.02.19), და „საავტომობილო გზების შესახებ საქართველოს კანონში“ (26.06.19),

ფუნქციონირებს ასოცირების შესახებ შეთანხმებისა და ასოცირების დღის წესრიგის განხორციელების მონიტორინგის ელექტრონული პროგრამა და შესაბამისი ინტერნეტ პორტალი (aa-monitoring.ge), რომელიც სისტემატიურად იხვეწება, როგორც ფუნქციონალურად, ასევე, შინაარსობრივი თვალსაზრისით.

¹ წარმოდგენილი ინფორმაციის ნაწილი სცილდება საანგარიშო პერიოდს

საანგარიშო პერიოდში, გაიმართა საქართველო - ევროკავშირის ასოცირების საბჭოს, ასოცირების კომიტეტისა და ეკონომიკური და დარგობრივი თანამშრომლობის 5 თემატური ჯგუფის შეხვედრები ქ. თბილისსა და ქ. ბრიუსელში. საქართველოსა და ევროკავშირის შორის გრძელდება 2018 წლის 21 ნოემბრის მაღალი დონის შეხვედრის შედეგების განხორციელებაზე და დასახულ პრიორიტეტებზე მუშაობა.

2019 წლის პირველ ნახევარში ქართული მხარის წარმომადგენლებმა მონაწილეობა მიიღეს „აღმოსავლეთ პარტნიორობის“ ფარგლებში გამართულ სხვადასხვა ტიპის ღონისძიებებში (პლატფორმებისა და პანელის შეხვედრები, სემინარები, ვორქშოპები, მინისტერიალი,

საქართველოს მთავრობა აქტიურად თანამშრომლობს სამოქალაქო საზოგადოების წარმომადგენლებთან, რომლებიც ჩართულნი არიან საქართველო-ევროკავშირის ასოცირების შეთანხმებისა და ასოცირების დღის წესრიგის განხორციელების ეროვნული სამოქმედო გეგმის შემუშავებისა და მისი შესრულების მონიტორინგის პროცესში. სისტემატიურად იმართებოდა შეხვედრები აღმოსავლეთ პარტნიორობის სამოქალაქო საზოგადოების ეროვნულ პლატფორმასა და საქართველოს მთავრობის წარმომადგენლებს შორის, ევროინტეგრაციის ფარგლებში მიმდინარე სექტორალური რეფორმების განხილვის მიზნით.

2. პოლიტიკური დიალოგი და რეფორმა, თანამშრომლობა საგარეო და უსაფრთხოების პოლიტიკის სფეროში

2.1 მართლმსაჯულების სისტემის რეფორმა

სასამართლო რეფორმის ე.წ. მეოთხე ტალღის ფარგლებში შემუშავდა და საკანონმდებლო ინიციატივის წესით წარდგენილია „საერთო სასამართლოების შესახებ“ საქართველოს ორგანულ კანონში ცვლილებების პროექტი, რომლის მიღება საშემოდგომო სესიაზე დაგეგმილი. პროექტით გათვალისწინებულია იუსტიციის უმაღლესი საბჭოს მიერ რაიონულ (საქალაქო) და სააპელაციო სასამართლოში მოსამართლის თანამდებობაზე უვალოდ განწესების შესახებ მიღებული გადაწყვეტილების დასაბუთებისა და მისი გამოკვეყნების ვალდებულება. აღნიშნული დასაბუთება უნდა შეიცავდეს პროცედურის აღწერასა და დანიშნული მოსამართლის დახასიათებას, მათ შორის, ინფორმაციას მის მიერ დაგროვებული ქულების შესახებ და დასკვნას კეთილსინდისიერების თაობაზე. დასაბუთებას ადგენს იუსტიციის უმაღლესი საბჭოს მდივანი.

მომზადებული საკანონმდებლო ცვლილებების პროექტით ახლებურად დარეგულირდება იუსტიციის უმაღლესი საბჭოს საქმიანობასთან დაკავშირებული ნორმები - განისაზღვრება იუსტიციის უმაღლესი საბჭოს აქტების კატეგორიები; გაფართოვდება იმ საკითხთა ჩამონათვალი, რომლის თაობაზეც იუსტიციის უმაღლესი საბჭოს მიერ გადაწყვეტილების მიღებისას გამოყენებული იქნება ინტერესთა შეუთავსებლობასთან დაკავშირებული წესები; დადგინდება იუსტიციის უმაღლესი საბჭოს სხდომის თარიღისა და დღის წესრიგის თაობაზე

ინფორმაციის, ასევე სხდომაზე განსახილველი ნორმატიული აქტის პროექტის ვებგვერდზე განთავსების ვალდებულება; განისაზღვრება I და II ინსტანციის მოსამართლეთა უვადოდ განწესების, აგრეთვე, რაიონული (საქალაქო) სასამართლოს თავმჯდომარის, სააპელაციო სასამართლოს თავმჯდომარისა და მისი მოადგილის თანამდებობაზე დანიშვნის შესახებ გადაწყვეტილების დასაბუთებისა და მისი გამოქვეყნების ვალდებულება; განისაზღვრება უზენაესი სასამართლოს მოსამართლეთა შერჩევის პროცესში მონაწილე პირთათვის იუსტიციის უმაღლესი საბჭოს მიერ მიღებული გადაწყვეტილების უზენაესი სასამართლოს საკვალიფიკაციო პალატაში გასაჩივრების შესაძლებლობა.

ზემოხსენებული კანონპროექტით **გაიწერა დისციპლინური გადაცდომების სახეები**. ამასთან, დამოუკიდებელ ინსპექტორს, კანონით განსაზღვრული საფუძვლების არსებობის შემთხვევაში, დისციპლინური სამართალწარმოების შეწყვეტის, დისციპლინურ საჩივარზე ხარვეზის დადგენისა და საჩივრის განხილვაზე უარის თქმის უფლებამოსილება მიენიჭება. პროექტით დგინდება დისციპლინური პასუხისმგებლობის დაკისრების ხანდაზმულობის ვადები და მკვიდრდება მტკიცებულებითი სტანდარტები.

დამოუკიდებელი ინსპექტორის საქმიანობისა და დისციპლინური სამართალწარმოების შესახებ საზოგადოების ინფორმირების მიზნით, დამოუკიდებელი ინსპექტორის სამსახურმა გამართა საჯარო ლექციები, რეგიონული ვიზიტები და შეხვედრები.

2019 წლის პირველ ნახევარში მედიაციის პილოტური პროექტი ამოქმედდა რუსთავის საქალაქო და გორის რაიონულ სასამართლოებში.

სასამართლო სისტემისა და ინდივიდუალურ მოსამართლეთა დამოუკიდებლობის გაძლიერების მიზნით, 2018 წლის იანვრიდან საქართველოს ყველა სასამართლოში (სადაც ერთზე მეტი მოსამართლეა) მოსამართლეთა შორის საქმეები ნაწილდება შემთხვევითი ელექტრონული განაწილების სისტემით. საქმეთა ელექტრონული განაწილების სისტემის **მონიტორინგის განმახორციელებელი მენეჯმენტის დეპარტამენტის შესაძლებლობების გაძლიერების მიზნით**, იუსტიციის უმაღლესმა საბჭომ 2019 წლის 21 იანვრის გადაწყვეტილებით, თანამდებობაზე აირჩია სასამართლო მენეჯმენტის დეპარტამენტის თავმჯდომარე. სასამართლო მენეჯმენტის დეპარტამენტის თანამშრომელთა შესაძლებლობების გაძლიერება 2019 წლის მეორე ნახევარში იგეგმება.

იუსტიციის **უმაღლესი სკოლის ინსტიტუციური დამოუკიდებლობის** უზრუნველყოფის მიზნით, შემუშავდა საკანონმდებლო ცვლილებების პროექტი. ერთ-ერთ მნიშვნელოვან ცვლილებას წარმოადგენს **იუსტიციის უმაღლესი სკოლის მსმენელთა მიღების პროცესის ახლებური წესი**. კერძოდ, იუსტიციის მსმენელთა მისაღები კონკურსის ჩატარების უფლებამოსილება, იუსტიციის უმაღლესი საბჭოს ნაცვლად, იუსტიციის უმაღლესი სკოლის დამოუკიდებელ საბჭოს მიენიჭება.

ევროკავშირის „სასამართლოს მხარდაჭერის“ პროექტის ფარგლებში შემუშავდა **უზენაესი სასამართლოს სამოქმედო გეგმა 2019 წლისთვის**.

საქართველოს უზენაესი სასამართლოს სტატისტიკის სამსახური თანამშრომლობს ევროკავშირის და ევროპის საბჭოს პროექტებთან, რომლის ფარგლებში განახლდა და დაინერგა შემდეგი ფორმები: „სტატისტიკის კონვენციის“ შესაბამისად **გენდერული სტატისტიკის მონაცემების შეგროვება**, ასევე კონვენციის შესაბამისად გამოცემული დამცავი ორდერებისა და გასაჩივრებული შემაკავებელი ორდერების მიხედვით **გენდერული სტატისტიკის წარმოება ძალადობის ყველა ფორმის გათვალისწინებით**, სისხლის სამართლის საქმეების მიხედვით **ქალთა მიმართ ძალადობისა და ოჯახში ძალადობის შესახებ სტატისტიკური მონაცემები**, დისკრიმინაციისა და სიძულვილით მოტივირებული დანაშაულებზე მონაცემები.

საერთო სასამართლოების ინფრასტრუქტურის შშმ პირების საჭიროებებზე მორგების მიზნით, შეირჩა ორგანიზაცია „პარტნიორობა ადამიანის უფლებებისთვის“. აღნიშნული ორგანიზაცია საერთაშორისო ექსპერტთან თანამშრომლობით, **საერთო სასამართლოების ყველა შენობის ინფრასტრუქტურას შეაფასებს**, შშმ პირების საჭიროებების გათვალისწინებით. შენობების ინფრასტრუქტურის შეფასება 2019 წლის ბოლომდე დასრულდება.

2.2 ადამიანის უფლებები და ძირითადი თავისუფლებები

გაფართოვდა შინაგან საქმეთა სამინისტროს ადამიანის უფლებათა დაცვისა და გამოძიების ხარისხის მონიტორინგის დეპარტამენტის მანდატი. აღნიშნული ცვლილების შესაბამისად, დეპარტამენტი ახორციელებს სიცოცხლისა და ჯანმრთელობის წინააღმდეგ მიმართულ დანაშაულთა, ასევე, სისხლის სამართლის პოლიტიკის პრიორიტეტების გათვალისწინებით, სხვა დანაშაულთა გამოძიების ხარისხის მონიტორინგს მთელი საქართველოს მასშტაბით. **საანგარიშო პერიოდში**, ადამიანის უფლებათა დაცვისა და გამოძიების ხარისხის მონიტორინგის დეპარტამენტმა შეაფასა და მონიტორინგი გაუწია 2000-მდე საქმეს. დეპარტამენტის მიერ გამოძიების მონიტორინგი ხორციელდება შეტყობინებებისა და ელექტრონულ სისტემაში ჩატვირთულ მონაცემებზე პოლიციელთა რეაგირების ადეკვატურობის და ხარისხის შეფასების გზით. ხარვეზის აღმოჩენის შემთხვევაში, დეპარტამენტის თანამშრომელი უკავშირდება საქმის გამომძიებელს (ან/და მის ზემდგომს), აძლევს შესაბამის მითითებებს და გამოსცემს რეკომენდაციებს. საჭიროების შემთხვევაში, გეგმავს კვალიფიკაციის ასამაღლებელ სამომავლო აქტივობებს.

სახალხო დამცველის აპარატში შემუშავდა **2019-2021 წლების ბავშვთა უფლებათა დეპარტამენტის სამუშაო გეგმა**. დეპარტამენტის შესაძლებლობების გაძლიერების მიზნით, 2019 წლის მაისიდან, გაეროს ბავშვთა ფონდის მხარდაჭერით ხორციელდება პროექტი, რომლის ფარგლებშიც დეპარტამენტში აყვანილ იქნა 2 მონიტორი და 1 მონიტორის ასისტენტი. აღნიშნული კადრები დეპარტამენტის თანამშრომლებთან ერთად ახორციელებენ საბავშვო ბაგა-ბაღების მონიტორინგს, შეისწავლიან ინდივიდუალურ საჩივრებსა და მომართავენ ბავშვის

უფლებების ხელყოფის ფაქტებთან დაკავშირებით და ახორციელებენ მანდატის ფარგლებში ზედამხედველობას შესაბამის შემთხვევებზე.

შემუშავდა იძულებით გადაადგილებულ პირთა დასახლებებში ბავშვთა უფლებების მდგომარეობის მონიტორინგის მეთოდოლოგია. განახლდა და ამოქმედდა გაუმჯობესებული არასრულწლოვანთა საქმეების მონიტორინგის სისტემა.

2019 წელს, იურიდიული დახმარების სამსახურის მანდატი გაფართოვდა არასრულწლოვანთა მართლმსაჯულების მიმართულებით. კერძოდ, „იურიდიული დახმარების შესახებ“ საქართველოს კანონსა და არასრულწლოვანთა მართლმსაჯულების კოდექსში განხორციელებული ცვლილებების საფუძველზე, სისხლის სამართლის საქმის წარმოების ნებისმიერ სტადიაზე, არასრულწლოვანი გამოსაკითხი პირი/მოწმე სარგებლობს იურიდიული დახმარების უფლებით.

არასრულწლოვანზე ორიენტირებული გარემო შეიქმნა ხელვაჩაურის რაიონულ პროკურატურაში.

მართლმსაჯულების პროცესის არასრულწლოვან მონაწილეებზე შეგროვდა სრულყოფილი სტატისტიკა. მისი წარდგენა მოხდა არასრულწლოვანთა მართლმსაჯულების კონფერენციაზე. იგი ასევე აისახა გენერალური პროკურორის ანგარიშში და გამოქვეყნდა პროკურატურის ვებგვერდზე.

საანგარიშო პერიოდში, ქალთა მიმართ ძალადობის, ოჯახში ძალადობის და სექსუალური ძალადობის საკითხებზე სულ განხორციელდა - 704 ზარი, აქედან მამრობითი - 176, მდედრობითი - 528.

ჩატარდა ოჯახურ დანაშაულთან ბრძოლის საკითხზე არსებული რეკომენდაციების შესრულების მონიტორინგი. მიმდინარეობს მუშაობა შიდაუწყებრივი რეკომენდაციების განახლების მიზნით.

2019 წლის პირველ ნახევარში ძალადობის მსხვერპლთა მომსახურების დაწესებულებით, კერძოდ, თავშესაფარში დროებითი საცხოვრისით ისარგებლა 246-მა პირმა. თავშესაფარში არსებული სხვა მომსახურებებით, კერძოდ: ფსიქო-სოციალური დახმარებით ისარგებლა -153-მა პირმა, სამედიცინო მომსახურებით - 100-მა და სამართლებრივი დახმარებით - 94-მა პირმა.

კრიზისული ცენტრების მომსახურებით, საანგარიშო პერიოდში, სულ ისარგებლა 126-მა პირმა, მათ შორის, ფსიქოლოგიური მომსახურებით - 111-მა; სამართლებრივი მომსახურება გაეწია 84 პირს, სოციალური პრობლემების მოგვარებაში დახმარება გაეწია 32-ს და სამედიცინო დახმარება -13 პირს. სავარაუდო მსხვერპლთათვის სადღეღამისო საცხოვრისით თბილისში ისარგებლა ერთმა სავარაუდო მსხვერპლმა და მასზე დამოკიდებულმა ერთმა არასრულწლოვანმა პირმა.

მიმდინარეობს მუშაობა თავშესაფრის მაძიებელთა „მიმღებ ცენტრში განთავსების ან სხვა ადგილას განსახლების წესში“ განსახორციელებელი ცვლილებების პროექტზე.

მომზადებულია **ბრალდებულთა/მსჯავრდებულთა სუიციდის პრევენციის პროგრამის შეფასების გეგმა**, რომლის დამტკიცების შემდეგ სუიციდის პრევენციის პროგრამის საბჭოს წევრები პენიტენციურ დაწესებულებებში განახორციელებენ გეგმიურ ვიზიტებს ინტერვიუების, პროგრამის მონიტორინგისა და მიმდინარე საჭიროებათა იდენტიფიცირების მიზნით.

შეიქმნა სპეციალური პენიტენციური სამსახურის მსჯავრდებულთა რესოციალიზაცია-რეაბილიტაციის დეპარტამენტი.

განხორციელდა არასრულწლოვანი მსჯავრდებულებისთვის/განრიდებულებისთვის და წინასასამართლო ეტაპისთვის რისკების და საჭიროებების შეფასების ახალი ინსტრუმენტის პილოტირება საქართველოს 4 რეგიონში. პრობაციის ეროვნულ სააგენტოში რისკების და საჭიროებების შეფასების ახალ ინსტრუმენტზე სამუშაოდ გადამზადდა ყველა თანამშრომელი (პრობაციის ოფიცერი, სოციალური მუშაკი, ფსიქოლოგი). ასევე, პენიტენციური სისტემის ყველა თანამშრომელმა, რომლებმაც სამოქმედო გეგმის მიხედვით 2019 წლიდან უნდა გამოიყენონ რისკების და საჭიროებების შეფასების ახალი ინსტრუმენტი, გაიარა შესაბამისი ტრენინგი.

თავისუფლების აღკვეთის ან სხვაგვარად შეზღუდვის ადგილებში პრევენციის ეროვნული მექანიზმის ფუნქციების განხორციელების მიზნით, სპეციალური პრევენციული ჯგუფის მიერ განხორციელდა მონიტორინგის ვიზიტები შინაგან საქმეთა სამინისტროს მიგრაციის დეპარტამენტის დროებითი განთავსების ცენტრსა (1 ვიზიტი) და აკად. ბ. ნანეიშვილის სახელობის ფსიქიკური ჯანმრთელობის ეროვნულ ცენტრში (4 ვიზიტი); ასევე, პენიტენციური დაწესებულების მონიტორინგის მიზნით, განხორციელდა ვიზიტები N2, N8, N14 და N15 პენიტენციურ დაწესებულებებში - სულ 10 ვიზიტი.

2019 წლის თებერვალში შეიქმნა გათავისუფლებისთვის მომზადების სამუშაო ჯგუფი და საანგარიშო პერიოდში ჩატარდა რამდენიმე შეხვედრა. ჯგუფის საქმიანობაში აქტიურად მონაწილეობენ ევროკავშირის პროექტის - EU4JUSTICE „პენიტენციური და პრობაციის სისტემების ხელშეწყობის“ წარმომადგენლები. ევროკავშირის პროექტის დახმარებითა და ექსპერტების ჩართულობით, მომზადდა გათავისუფლებისთვის მომზადების კონცეფციის პროექტი.

ევროპის საბჭოს პროექტის - „თავისუფლებააღკვეთილ პირთა ფსიქიკური ჯანდაცვის გაუმჯობესება საქართველოში“ და სპეციალური პენიტენციური სამსახურის სამედიცინო დეპარტამენტის ერთობლივი მუშაობის შედეგად შემუშავდა პენიტენციური ჯანდაცვის სტანდარტის განახლებული დოკუმენტი.

საქართველოს სახალხო დამცველის მიერ, განხორციელდა ვიზიტები N11 პენიტენციურ სარეაბილიტაციო დაწესებულებაში და შესწავლილ იქნა იქ მოთავსებულ ბავშვთა მდგომარეობა და საჭიროებანი; შემუშავდა კვლევის მეთოდოლოგია - „ქუჩაში მცხოვრები და მომუშავე ბავშვები“ და მომზადდა კვლევის კონცეფცია - „განათლების მიღმა დარჩენილი ბავშვები“.

საქართველოს სახალხო დამცველის წარმომადგენელმა კონფლიქტით დაზარალებულ პირთა უფლებების შესწავლის მიზნით, მონიტორინგი განახორციელა გამყოფი ხაზის მიმდებარე რამდენიმე სოფელში.

2.3 საჯარო სამსახურის რეფორმა და კორუფციასთან ბრძოლა

ანტიკორუფციული საბჭოს სხდომაზე დამტკიცდა 2019-2020 წლების ანტიკორუფციული სამოქმედო გეგმა და სტრატეგია. აღნიშნული დოკუმენტები წარედგინება მთავრობას დასამტკიცებლად. კორუფციული რისკების შეფასების მეთოდოლოგიის შემუშავება გაწერილია 2019-2020 წლების ანტიკორუფციულ სამოქმედო გეგმაში.

საანგარიშო პერიოდში, საჯარო სამსახურის ბიურომ, გაეროს განვითარების პროგრამის (UNDP) მხარდაჭერით განხორციელებული - „საჯარო სამსახურის შესახებ საქართველოს კანონსა და ანტიკორუფციულ მექანიზმებზე ცნობიერების ამაღლების გზით, საჯარო სამსახურის რეფორმის დანერგვის მხარდაჭერის პროექტის“ - ფარგლებში, საჯარო სამსახურის შესახებ საქართველოს კანონის სიახლეებისა და ეთიკის საკითხებზე ჩაატარა ტრენინგები და სამუშაო შეხვედრები, რომელშიც მონაწილეობა მიიღო სახელმწიფო უწყებების 77-მა და ადგილობრივი თვითმმართველობის ორგანოების 76-მა წარმომადგენელმა.

2019 წლის განმავლობაში შესამოწმებელი დეკლარაციების საერთო რაოდენობა 607 დეკლარაციას შეადგენს. მიმდინარე წლის 30 ივნისის მდგომარეობით, შემოწმება დასრულებულია 244 დეკლარანტთან მიმართებით.

კორუფციის საქმეების ეფექტიანი გამოძიების თემაზე ჩატარდა 3 სასწავლო აქტივობა. აღნიშნული აქტივობების ფარგლებში გადამზადდა 39 პროკურორი, პროკურატურის გამომძიებელი და სტაჟიორი.

2.4 თანამშრომლობა საგარეო და უსაფრთხოების პოლიტიკის სფეროში

საანგარიშო პერიოდში გაიმართა ჟენევის საერთაშორისო მოლაპარაკებების 47-ე და 48-ე რაუნდი. განსაკუთრებული აქცენტი კეთდებოდა რუსეთის მიერ 2008 წლის 12 აგვისტოს ცეცხლის შეწყვეტის შეთანხმების შესრულების აუცილებლობაზე. საქართველოს წარმომადგენლები აგრძელებდნენ ძალისხმევას რუსეთის მხრიდან ძალის არგამოყენების შესახებ ვალდებულებების დადასტურებისა და შესრულების, უსაფრთხოების საერთაშორისო მექანიზმების შექმნისა და იძულებით გადაადგილებულ პირთა და ლტოლვილთა უსაფრთხო

და ღირსეული დაბრუნების უზრუნველსაყოფად. განსაკუთრებული ყურადღება ეთმობოდა ოკუპირებულ რეგიონებში მიმდინარე უკანონო მილიტარიზაციას, რეგულარულ სამხედრო წვრთნებსა და საჰაერო სივრცის დარღვევის ფაქტებს.

ქართული მხარე მუდმივად სვამდა ირაკლი კვარაცხელიას რუსეთის სამხედრო ბაზაზე უკანონო პატიმრობაში გარდაცვალების საკითხს, აგრეთვე არჩილ ტატუნაშვილის, გიგა ოთხოზორიასა და დავით ბაშარულის მკვლელობის საქმეებზე მართლმსაჯულების აღსრულების აუცილებლობას.

რეგულარულ ხასიათს ატარებდა კონსულტაციები თანათავმჯდომარეებთან ევროკავშირის, გაეროსა და ეუთოს მხრიდან, აგრეთვე მონაწილეებთან აშშ-დან, ჟენევის საერთაშორისო მოლაპარაკებებში მათი მხარდაჭერის მობილიზებისა და განმტკიცების მიზნით.

განსაკუთრებული ყურადღება ეთმობოდა ევროკავშირის, როგორც ცეცხლის შეწყვეტის შეთანხმების მედიატორისა და გარანტორი ორგანიზაციის, როლისა და ჩართულობის გაძლიერებას ჟენევის საერთაშორისო მოლაპარაკებებში.

აქცენტი კეთდებოდა საერთაშორისო ძალისხმევის მობილიზებაზე, მოლაპარაკებების დღის წესრიგის მთავარ საკითხებზე პროგრესის უზრუნველყოფის მიზნით, როგორცაა ძალის არგამოყენება, უსაფრთხოების საერთაშორისო მექანიზმების შექმნა და იბულებთ გადაადგილებულ პირთა და ლტოლვილთა უსაფრთხო და ღირსეული დაბრუნება. ძალისხმევა მიმართული იყო, რათა საერთაშორისო თანამეგობრობის ჩართულობით შესაძლებელი გამხდარიყო უსაფრთხოების, ადამიანის უფლებებისა და ჰუმანიტარულ საკითხებზე პროგრესის მიღწევა.¹

განსაკუთრებული იყო ძალისხმევა რუსეთ-საქართველოს კონფლიქტთან დაკავშირებული საკითხების საერთაშორისო ორგანიზაციების (გაერო, ეუთო, ევროპის საბჭო) დღის წესრიგში შემდგომი გააქტიურების მიზნით. შედეგად, საქართველოს ოკუპირებულ ტერიტორიებზე უსაფრთხოებისა და ადამიანის უფლებათა კუთხით არსებული მძიმე ვითარება და საქართველოს წინააღმდეგ მიმართული რუსეთის პროვოკაციული ქმედებები არაერთხელ იქნა განხილული სხვადასხვა საერთაშორისო ფორმატებში. მათ შორისაა, გაეროს გენერალური ასამბლეა, ეუთოს მუდმივი საბჭო, ეუთო-ს უსაფრთხოების საკითხების მიმოხილვის ყოველწლიური კონფერენცია, ევროპის საბჭოს მინისტრთა მოადგილეების კომიტეტი, ევროკავშირი-საქართველოს ასოცირების საბჭო, ევროკავშირი-საქართველოს ასოცირების კომიტეტი, აგრეთვე ევროკავშირის-საქართველოს საპარლამენტო ასოცირების კომიტეტი, სხვადასხვა კონფერენციები, მრგვალი მაგიდის ფორმატის ღონისძიებები და სხვ.

¹ რუსეთის საოკუპაციო ძალების და ოკუპირებული აფხაზეთის წარმომადგენლების გადაწყვეტილებით, ოკუპირებული აფხაზეთის მიმართულებით, IPRM-ის შეხვედრები 2018 წლის 27 ივნისიდან კვლავ შეწყვეტილია

ამასთან, რუსეთ-საქართველოს კონფლიქტის თემაზე მომზადდა არაერთი საერთაშორისო დოკუმენტი. მათ შორის, განსაკუთრებულად უნდა აღინიშნოს: გაეროს გენერალური ასამბლეის რეზოლუცია „აფხაზეთიდან, საქართველო და ცხინვალის რეგიონიდან/სამხრეთ ოსეთი, საქართველო იძულებით გადაადგილებულ პირთა და ლტოლვილთა სტატუსის შესახებ“, გაეროს ადამიანის უფლებათა საბჭოს რეზოლუცია „თანამშრომლობა საქართველოსთან“, გაეროს გენერალური მდივნის ანგარიში „აფხაზეთიდან, საქართველო და ცხინვალის რეგიონიდან/სამხრეთ ოსეთი, საქართველო იძულებით გადაადგილებულ პირთა და ლტოლვილთა სტატუსის შესახებ“, ევროპის საბჭოს მინისტრთა მოადგილეების კომიტეტის გადაწყვეტილება „ევროპის საბჭო და კონფლიქტი საქართველოში“, ევროპის საბჭოს გენერალური მდივნის მე-19 კონსოლიდირებული ანგარიშის - „კონფლიქტი საქართველოში“, ეუთოს საპარლამენტო ასამბლეის რეზოლუცია „უსაფრთხოებისა და ადამიანის უფლებათა მდგომარეობა აფხაზეთი, საქართველო და ცხინვალის რეგიონში/სამხრეთ ოსეთში, საქართველო“, აშშ-ს კონგრესის საქართველოს მხარდამჭერი აქტი და სხვ.

საქართველოსა და ევროკავშირს შორის გაგრძელდა კონსულტაციები ასოცირების შეთანხმებიდან და შენგენის ზონაში უვიზო მიმოსვლის რეჟიმიდან, გამომდინარე სარგებელის ადმინისტრაციულ გამყოფ ხაზს მიღმა მცხოვრები მოსახლეობისთვის გაზიარების უზრუნველყოფის მიზნით გზების შესამუშავებლად.

საქართველო აქტიურად თანამშრომლობდა ევროკავშირის სადამკვირვებლო მისიასთან საოკუპაციო ხაზზე კონფლიქტის ესკალაციის პრევენციისა და რუსეთის პროვოკაციულ ქმედებებთან გამკლავების მიზნით. გაგრძელდა კოორდინაცია ადგილობრივი მოსახლეობის საჭიროებებზე რეაგირებისა და ადგილზე უსაფრთხოების უზრუნველყოფის მიზნით, მათ შორის, ჟენევის საერთაშორისო მოლაპარაკებებისა და ინციდენტების პრევენციისა და მათზე რეაგირების მექანიზმების ფარგლებში.

2019 წელს დაიწყო სამშვიდობო ინიციატივის "ნაბიჯი უკეთესი მომავლისკენ" აქტიური განხორციელება. დასრულდა სამართლებრივი პროცესი, რომლითაც ამოქმედდა სამშვიდობო ინიციატივით გათვალისწინებული სხვადასხვა მნიშვნელოვანი ინსტრუმენტები, როგორცაა, პირადი ნომრით სტატუს ნეიტრალური რეგისტრაციის საშუალება, სპეციალური საწარმოს სტატუსის მიღების წესი, ოკუპირებულ ტერიტორიებზე საქმიანობისთვის სპეციალური თანხმობის გაცემის წესი და საგადასახადო შეღავათების მიღება.

2018 წლის 22 ნოემბერს საქართველოს მთავრობამ დაამტკიცა ახალი უპრეცედენტო საგრანტო პროგრამა „აწარმოე უკეთესი მომავლისთვის“, რომელიც გულისხმობს, გამყოფი ხაზის გასწვრივ სავაჭრო-ეკონომიკური საქმიანობის ხელშეწყობას და ამ მიზნით გამყოფი ხაზების ორივე მხარეს მცხოვრები მოსახლეობის ინდივიდუალური და ერთობლივი წარმოებისა და პარტნიორული პროექტების მხარდაჭერას 7,000-დან 35,000 ლარის ფარგლებში. პროგრამის პირველი საგრანტო კონკურსი გამოცხადდა 2019 წლის 12 მარტს, რომლის ფარგლებშიც შემოვიდა განაცხადების უპრეცედენტო რაოდენობა - 386 განაცხადი, აქედან 274 განაცხადი (75%) უშუალოდ

ოკუპირებული ტერიტორიებიდან. ნიშანდობლივია, რომ განაცხადები შემოსულია არამხოლოდ გალისა და ახალგორის რაიონის, არამედ აფხაზეთისა და ცხინვალის რეგიონის ფაქტობრივად ყველა რაიონიდან.

საქართველოს მთავრობა ინტენსიურად მუშაობს საერთაშორისო პარტნიორებთან სამშვიდობო ინიციატივით გათვალისწინებული მეორე ფინანსური ინსტრუმენტის - **სპეციალური დამოუკიდებელი ფონდის შესაქმნელად, რომელიც მოემსახურება ინიციატივით „ნაბიჯი უკეთესი მომავლისკენ“ გათვალისწინებულ ამოცანებს**, ხელს შეუწყობს გაყოფილ საზოგადოებებს შორის დიალოგს და ნდობის აღდგენას, საერთო ინტერესების გარშემო თანამშრომლობას, გამყოფი ხაზების გასწვრივ კონკრეტული სავაჭრო პროექტების/ინიციატივების განხორციელებას.

საკოორდინაციო მექანიზმის საშუალებით, რომელიც აგრძელებს ეფექტურად მუშაობას ჩართულობის სამოქმედო გეგმის ფარგლებში, საქართველოს მთავრობა განაგრძობს **აფხაზეთის რეგიონისთვის საჭირო ვაქცინების მიწოდებას**. საანგარიშო პერიოდში აფხაზეთის რეგიონს გადაეცა იმუნოხაცის, წითელას და ანტი-რაბიული ვაქცინები, დიაბეტის, ტუბერკულოზის საწინააღმდეგო ანტიბიოტიკები და აივ/შიდსის საწინააღმდეგო მედიკამენტები, რომელთა ღირებულებამ დაახლოებით 500 000 ლარი შეადგინა.

საქართველოს ოკუპირებული ტერიტორიების მცხოვრებლები **აგრძელებენ C ჰეპატიტის ელიმინაციის პროგრამაში ჩართვას და სათანადო სამედიცინო მომსახურების მიღებას**. განიხილება აღნიშნული პროგრამის ოკუპირებულ ტერიტორიებზე მცხოვრები პირებისათვის კიდევ უფრო ხელმისაწვდომობის საკითხი.

საანგარიშო პერიოდში საერთაშორისო და არასამთავრობო ორგანიზაციების მიერ ოკუპირებული რეგიონების მიმართულებით დაფინანსდა და დაიწყო დამატებით 23 პროექტი. ყველა მათგანზე გაიცა შესაბამისი თანხმობა.

2019 წლის 18-19 ივნისს, ქ. ბრიუსელში აღმოსავლეთ პარტნიორობის უსაფრთხოების, CSDP-ისა და სამოქალაქო დაცვის საკითხებზე პანელის ფარგლებში ad hoc ვიზიტი გაიმართა CSDP საკითხებზე მომუშავე საჯარო მოხელეებისთვის. საქართველოს მხრიდან შეხვედრაში მონაწილეობა მიიღო ოთხმა წარმომადგენელმა.

ერთიანი უსაფრთხოებისა და თავდაცვის პოლიტიკის ფარგლებში (CSDP) ევროკავშირის მისიებსა და ოპერაციებში მონაწილეობა გრძელდება. **ცენტრალური აფრიკის რესპუბლიკაში ევროკავშირის საწვრთნელ მისიაში (EUTM RCA) ეროვნული გვარდიის მორიგი ოცეული გაემგზავრა 2019 წლის მარტში**. როტაცია განხორციელდა 2019 წლის 31 აგვისტო - 2 სექტემბრის პერიოდში. მალის რესპუბლიკაში ევროკავშირის საწვრთნელ მისიაში (EUTM Mali) მონაწილე ოფიცერის როტაცია იგეგმება 2019 წლის ნოემბერში.

სახელმწიფო თავდაცვის პოლიტიკის დაგეგმვის კოორდინაციის მუდმივმოქმედი უწყებათაშორისი კომისიის და სამუშაო ჯგუფის ფარგლებში შემუშავდა „ეროვნული თავდაცვის სტრატეგია 2020-2030წ.“ დოკუმენტის პროექტი. თავდაცვის ეროვნული მზადყოფნის გეგმის შემუშავება დაიწყება თავდაცვის ეროვნული სტრატეგიის განხილვისა და დამტკიცების პროცედურების დასრულების შემდგომ. თავდაცვის კოდექსი გადის შესაბამის შიდა პროცედურებს და დასამტკიცებლად წარდგენა ნავარაუდევია მიმდინარე წლის შემოდგომაზე.

3. თავისუფლება, უსაფრთხოება და მართლმსაჯულება

2019 წლის იანვარ-ივნისის პერიოდში, საქართველოს მიერ გაფორმებული რეადმისიის ხელშეკრულებების ფარგლებში, შსს-ს მიგრაციის დეპარტამენტმა განიხილა რეადმისიის განაცხადი 1670 პირზე, აქედან დადებითი გადაწყვეტილება მიღებულ იქნა 1631, ხოლო უარყოფითი - 39 პირზე.

საანგარიშო პერიოდში, სახელმწიფო ინსპექტორის სამსახურმა შეისწავლა მოქალაქეთა 86 განცხადება და შეტყობინება, განახორციელა 53 ინსპექტირება, ამასთან, სამსახურმა გასწია 1668 კონსულტაცია პერსონალურ მონაცემთა დაცვასთან დაკავშირებული სხვადასხვა თემატიკით და ჩაატარა 24 ტრენინგი და საინფორმაციო შეხვედრა, ჯამში 530-მდე მონაწილით.

მიმდინარეობს მუშაობა თავშესაფრის მაძიებელთა „მიმღებ ცენტრში განთავსების ან სხვა ადგილას განსახლების წესში“ განსახორციელებელი ცვლილებების პროექტზე.

ცივი იარაღის ბრუნვის რეგულირების მიზნით შემუშავებული საკანონმდებლო ცვლილებები წარდგენილია საქართველოს პარლამენტში, სადაც პროექტის მისაღებად მიმდინარეობს შესაბამისი საკანონმდებლო პროცედურები.

აშშ-ს თავდაცვის საფრთხეების შემცირების სააგენტოს ფინანსური მხარდაჭერით მიმდინარეობს სახმელეთო საზღვრის დაცვის დეპარტამენტის სასაზღვრო სექტორების მშენებლობა და რეკონსტრუქცია. სასაზღვრო პოლიციას აშშ-ს თავდაცვის საფრთხეების შემცირების სააგენტოს ფინანსური მხარდაჭერით გადმოეცა 8 ერთეული თოვლმავალი და 30 ერთეული კვადროციკლი, ასევე, დაკვირვების სისტემების აღჭურვილობა, მათ შორის თერმული ხედვისა და ღამის ხედვის აღჭურვილობა და აბორდაჟის აღჭურვილობა.

შემუშავებულია საზღვრის ინტეგრირებული მართვის სტრატეგიის სამუშაო ვერსია, რომელიც მიმდინარე წლის შემოდგომაზე დამტკიცდება.

გაღრმავდა თანამშრომლობა Frontex-თან, ევროკავშირის შიდა პროცედურების დასრულებისთანავე მოეწერება ხელი ახალ სამუშაო შეთანხმებას. გაიზარდა Frontex-ის მანდატით თბილისისა და ქუთაისის საერთაშორისო აეროპორტებში მოვლენილი ევროკავშირის წევრი ქვეყნების მესაზღვრე ოფიცრების რაოდენობა. ასევე, 2019 წლის 2 ივნისიდან 1 თვიანი როტაციის პრინციპით წარიგზავნა შინაგან საქმეთა სამინისტროს

საპატრულო პოლიციის დეპარტამენტის ოფიცრები ევროკავშირის წევრი ქვეყნების აეროპორტებში. Frontex-თან არსებული თანამშრომლობის ფარგლებში შინაგან საქმეთა სამინისტროს წარმომადგენლებმა მონაწილეობა მიიღეს Frontex-ის მიერ ორგანიზებულ 25 სხვადასხვა აქტივობაში: ერთობლივ ოპერაციებში, სამუშაო შეხვედრებსა და ტრენინგებში.

დასრულდა მიგრაციის პროფილისთვის მონაცემების შეგროვება და მომზადდა დოკუმენტის პირველი სამუშაო ვერსია. ანალიტიკური სისტემიდან მომზადდა ანგარიშის სამუშაო ვერსია 2019 წლის მიგრაციის პროფილის ფარგლებში გამოსაქვეყნებლად.

ევროპოლთან არსებული წარმატებული თანამშრომლობის შედეგად, 2019 წლის პირველი ნახევრის მდგომარეობით, საქართველო გაწევრიანდა ევროპოლის 2 ანალიტიკურ პროექტში: 1) საკუთრების წინააღმდეგ მიმართული დანაშაულის ჯგუფი, ე.წ. ფურტუმი; 2) აღმოსავლეთ ევროპული ორგანიზებული დანაშაულის წინააღმდეგ ბრძოლის ანალიტიკური ჯგუფი - EEOC.

ორგანიზებულ დანაშაულთან ბრძოლის მიზნით, 2019 წლის 10 მაისს, თბილისში, ხელი მოეწერა ადმინისტრაციულ შეთანხმებას საქართველოსა და საფრანგეთს შორის ოპერატიული საპოლიციო თანამშრომლობის გაძლიერებისა და საფრანგეთში მივლენილი ქართველი პოლიციელების მიღების შესახებ. შეთანხმება ძალაშია ხელმოწერის დღიდან და მემორანდუმის სტატუსი აქვს.

ორგანიზებული დანაშაულის გამოვლენის და აღკვეთის მიზნით, შსს-მ გააქტიურა ძალისხმევა. შესაბამისად, შსს-ს ცენტრალური კრიმინალური პოლიციის დეპარტამენტის მიერ გატარებული ღონისძიებების შედეგად დაკავებული იქნა 15 ორგანიზებული დანაშაულებრივი ჯგუფი 45 პირის მონაწილეობით.

შინაგან საქმეთა სამინისტრო აგრძელებს აქტიურ მუშაობას ანალიზზე დაფუძნებული საპოლიციო საქმიანობისა და საზოგადოებაზე ორიენტირებული საპოლიციო საქმიანობის მიმართულებით. ქალაქ თბილისისა და შიდა ქართლის პოლიციის დეპარტამენტებში შეიქმნა ანალიტიკოსის შტატი. მიმდინარეობს ანალიზზე დაფუძნებულ საპოლიციო საქმიანობაში ჩართული თანამშრომლების შესაძლებლობების/უნარების განვითარება.

ასევე, გრძელდება საზოგადოებაზე ორიენტირებული საპოლიციო საქმიანობის საპილოტე პროექტის განხორციელება. ამ ეტაპზე ქალაქ თბილისის პოლიციის დეპარტამენტში დანიშნულია 177 მართლწესრიგის ოფიცერი. პარალელურად მიმდინარეობს მართლწესრიგის ოფიცრების შესაძლებლობების განვითარება და საზოგადოების ცნობიერების ამაღლება ახალი ინსტიტუტის საქმიანობასთან დაკავშირებით.

CEPOL-ის გაცვლით პროგრამებს და რეზიდენტულ კურსებში მონაწილეობას იღებენ შინაგან საქმეთა სამინისტროს, სახელმწიფო უსაფრთხოების სამსახურის, ფინანსთა სამინისტროს, პროკურატურის, იუსტიციის სამინისტროსა და სახელმწიფო დაცვის სპეციალური სამსახურის თანამშრომლები. 2019 წლის განმავლობაში, შსს აკადემიის კოორდინაციით, CEPOL-ის

გაცვლით პროგრამებში იგეგმება 38 თანამშრომლის მონაწილეობა სხვადასხვა უწყებიდან. საანგარიშო პერიოდში, უკვე განხორციელდა 29 თანამშრომლის ვიზიტი.

„ევროჯასტსა და საქართველოს შორის თანამშრომლობის შესახებ“ შეთანხმებას მხარეების მიერ ხელი მოეწერა 2019 წლის 29 მარტს, ჰააგაში, ნიდერლანდების სამეფოში. შეთანხმების ძალაში შესვლის მიზნით, საკანონმდებლო ცვლილებები საქართველოს პარლამენტს წარედგინა 2019 წლის 8 მაისს. პარლამენტმა შეთანხმების რატიფიცირება მოახდინა 2019 წლის 29 მაისს.

2019 წლის იანვარსა და მაისში საქართველოს პროკურატურისა და ევროკავშირის ქონების დაბრუნების ოფისების (EU AROs) წარმომადგენლებს შორის ჩატარდა 2 შეხვედრა, რომლის ფარგლებშიც გაცვლილი იქნა ინფორმაცია თანამშრომლობის საკითხებზე.

2019 წლის 2-4 აპრილს საქართველოს იუსტიციის სამინისტრომ ვიზიტით მიიღო ევროპის ნარკოტიკული საშუალებებისა და ნარკომანიის მონიტორინგის ცენტრის (EMCDDA) შემფასებელი მისია, რომელსაც მიეწოდა ინფორმაცია ქვეყანაში მიმდინარე პროცესებისა და არსებული ვითარების შესახებ. დამატებით, ცენტრის დაფუძნების შემდეგ ინტენსიურად მოხდება მტკიცებულებებზე დაფუძნებული მონაცემებისა და ინფორმაციის გაზიარება ევროპული ცენტრისათვის.

2019 წლის 14 მაისს ნარკომანიასთან ბრძოლის უწყებათაშორისმა საკოორდინაციო საბჭომ განიხილა და დაამტკიცა ნარკომანიასთან ბრძოლის 2019-2020 წლების სამოქმედო გეგმა.

საანგარიშო პერიოდში ადამიანით ვაჭრობის (ტრეფიკინგის) მსხვერპლთა, დაზარალებულთა დაცვისა და დახმარების სახელმწიფო ფონდმა და შინაგან საქმეთა სამინისტრომ ჩაატარეს საინფორმაციო შეხვედრები ტრეფიკინგის თემაზე ხაშურსა და დუშეთში (სულ 85 მონაწილე), მარნეულში (105 მონაწილე), შიდა ქართლის სოფელ ჭალაში (40 მონაწილე), კოდაში (15 მონაწილე), თბილისში (44 მონაწილე). სამიზნე ჯგუფს წარმოადგენდნენ სკოლის მოსწავლეები, სტუდენტები, ეთნიკური უმცირესობები და ზოგადად ადგილობრივი მოსახლეობა.

ბავშვთა შრომის საწინააღმდეგო საერთაშორისო დღესთან დაკავშირებით (12 ივნისი) კვირეულის ფარგლებში სსიპ „დანაშაულის პრევენციის ცენტრმა“ საქართველოს 12 ქალაქში/დაბაში ჩაატარა საინფორმაციო შეხვედრები 13-18 წლის მოზარდებთან. კამპანიის მიზანს წარმოადგენდა შრომითი უფლებების შესახებ ბავშვებისთვის ცნობიერების ამაღლება. შეხვედრების ფარგლებში ყურადღება გამახვილდა, ასევე, ტრეფიკინგსა და ბავშვთა შრომით ექსპლუატაციაზე. შეხვედრებს ჯამში 146 მონაწილე დაესწრო და ჩატარდა თბილისში, მცხეთაში, გორში, ოზურგეთში, ლანჩხუთში, ლესაში, ბორჯომში, ახალციხეში, აწყურში, ვალეში, ადიგენსა და ახალქალაქში.

2019 წლის 24 იანვარს, საქართველო შეუერთდა ატომური ენერჯის საერთაშორისო სააგენტოს 2017 წლის 11 სექტემბრის „გამოყენებიდან ამოღებული რადიოაქტიური წყაროების მართვის სახელმძღვანელოს“, რომელიც წარმოადგენს ატომური ენერჯის საერთაშორისო სააგენტოს

მიერ შემუშავებული რადიოაქტიური წყაროების უსაფრთხოებისა და დაცულობის ქცევის კოდექსის დამატებას.

საქართველომ გაავრცელა **უუთო-ს უსაფრთხოებისათვის თანამშრომლობის ფორუმის შესაბამისი გადაწყვეტილებებით გათვალისწინებული შემდეგი ანგარიშები**: ინფორმაცია 2019 წლის სამხედრო დაგეგმარებისა და ბიუჯეტის შესახებ (FSC.DOC/1/11), ინფორმაცია ჩვეულებრივი შეიარაღებისა და მასთან დაკავშირებული ტექნოლოგიების ექსპორტის პოლიტიკის შესახებ (FSC.DEC/20/95), ინფორმაცია მცირე და მსუბუქი შეიარაღებისა და ჩვეულებრივი აღჭურვილობის მარაგების თაობაზე საკონტაქტო პირის შესახებ (FSC.DEC/4/08); კითხვარი სამხედრო ინფორმაციის გაცვლის შესახებ (FSC.DEC/1/19); კითხვარი ქვეითსაწინააღმდეგო ნაღმების შესახებ (FSC.DEC/7/04). ასევე, ეროვნული ანგარიში სახელმწიფოს მიერ მიღებული ზომების შესახებ, „ჩვეულებრივი იარაღის მეტისმეტი დაზიანების მიმყენებელ ან განურჩეველი მოქმედების სახეობათა გამოყენების აკრძალვის ან შეზღუდვის შესახებ“ 1980 წლის კონვენციის (CCW) მეოთხე გადასახედი კონფერენციის გადაწყვეტილების თანახმად, კონვენციის თავსებადობის, მისი მეორე დამატებითი და მეხუთე ოქმების იმპლემენტაციის საკითხებზე; იარაღით ვაჭრობის ხელშეკრულებით ATT გათვალისწინებული წლიური ანგარიში; გაეროს გენერალური ასამბლეის მიერ 2018 წლის დეკემბერში მიღებული შემდეგი რეზოლუციების: 73/51 “Information on confidence-building measures in the field of conventional arms”; 73/34 “Conventional arms control at the regional and subregional levels”; 73/27 “Developments in the field of information and telecommunications in the context of international security”; 73/266 “Advancing responsible State behaviour in cyberspace in the context of international security” შესაბამისი ანგარიშები.

2019 წლის იანვარ-ივნისის პერიოდში, ქიმიური, ბიოლოგიური, რადიაციული და ბირთვული (ქბრბ) საფრთხეების შემცირების ეროვნული სტრატეგიის სამოქმედო გეგმის ფარგლებში და რეაგირების შესაძლებლობების გაუმჯობესების კუთხით, **ცვლილებები შევიდა „ტექნიკური რეგლამენტის - „საქართველოში პესტიციდებისა და აგროქიმიკატების სარეგისტრაციო გამოცდების, ექსპერტიზისა და რეგისტრაციის დებულების დამტკიცების შესახებ“ საქართველოს მთავრობის 2013 წლის 31 დეკემბრის №443 დადგენილებაში**. ასევე, **ევროკავშირის №128/2009 რეგულაციის გათვალისწინებით**, სსიპ სურსათის ეროვნული სააგენტოს დირექტორის შიდა ბრძანებით, დამტკიცდა პესტიციდებთან დაკავშირებული საქმიანობის ოპერაციული პროცედურები, მათი რეალიზაციის მოწესრიგებისა და საჯარიმო სანქციების გამკაცრების მიზნით.

2019 წლის საანგარიშო პერიოდში, სასაზღვრო ოპერაციების მართვის სისტემით (BOMS) გათვალისწინებულ კომპონენტებთან სამუშაოდ, ტექნიკურ და პროგრამულ საკითხებში მომზადებულია შსს სსდ სასაზღვრო პოლიციის **80-მდე თანამშრომელი**.

აშშ-ს თავდაცვის საფრთხეების შემცირების სააგენტოს (DTRA) ფინანსური მხარდაჭერით, საქართველო-სომხეთის სახმელეთო საზღვრის შესაბამის სექტორებზე მოწყობილია

ელექტრონული დაკვირვების სისტემა და ექსპლუატაციაში გაშვებულია 2019 წლის ივლისის ბოლოდან.

სახელმწიფო უსაფრთხოების სამსახური აქტიურად თანამშრომლობს ტერორიზმის წინააღმდეგ ბრძოლის სფეროში პარტნიორ ქვეყნებთან და საერთაშორისო ორგანიზაციებთან ორმხრივ და მრავალმხრივ ფორმატში. საანგარიშო პერიოდში, მნიშვნელოვანი ნაბიჯები გადაიდგა ტერორიზმის საკითხებზე საერთაშორისო თანამშრომლობის გაღრმავების მიმართულებით სამართლებრივი ბაზის განვითარების კუთხით. 2019 წლის იანვარში, საქართველოს მთავრობამ დაამტკიცა ტერორიზმის წინააღმდეგ ბრძოლის შესახებ საქართველოს ეროვნული სტრატეგია და მისი სამწლიანი სამოქმედო გეგმა. საქართველოს მთავრობამ ხელი მოაწერა „საიდუმლო ინფორმაციის გაცვლისა და ორმხრივად დაცვის შესახებ“ შეთანხმებას კვიპროსის რეპუბლიკის მთავრობასთან. ძალაში შევიდა „საიდუმლო ინფორმაციის გაცვლისა და ორმხრივად დაცვის შესახებ მთავრობათაშორისი შეთანხმებები საქართველოსა და იტალიის რესპუბლიკას შორის, ასევე, საქართველოსა და მოლდოვას რესპუბლიკას შორის. ამასთან, მიმდინარეობს კონსულტაციები პარტნიორი ქვეყნების შესაბამის უწყებებთან მსგავსი შეთანხმების გაფორმების მიზნით.

4. ვაჭრობა და ვაჭრობასთან დაკავშირებული საკითხები

2019 წლის იანვარ-ივლისში, საქართველოდან ევროკავშირის ქვეყნებში განხორციელდა 503.5 მლნ. აშშ დოლარის ექსპორტი, რაც 20.6 პროცენტით მეტია წინა წლის შესაბამის მაჩვენებელზე და ქვეყნის მთლიანი ექსპორტის 24.0 პროცენტს შეადგენს. იმპორტის მოცულობამ 1 280.2 მლნ. აშშ დოლარს მიაღწია (12.6 პროცენტით ნაკლები) და მთლიანი იმპორტის 25.8 პროცენტი შეადგინა. სავაჭრო ბრუნვამ ევროკავშირის ქვეყნებთან 1 783.7 მლნ. აშშ დოლარი შეადგინა, რაც წინა წლის შესაბამის მაჩვენებელს 5.2 პროცენტით ჩამორჩება. რაც შეეხება სავაჭრო დეფიციტს, 2019 წლის იანვარ-ივლისში მთლიან უარყოფით სავაჭრო ბალანსში მისი წილი 27.2 პროცენტით განისაზღვრა.¹

2018-2020 წლების DCFTA-ს განხორციელების გრძელვადიან გეგმასთან ერთად, არსებული პრაქტიკის შესაბამისად, საქართველოს ეკონომიკისა და მდგრადი განვითარების მინისტრის ბრძანებით 2018 წლის დეკემბერში დამტკიცდა DCFTA-ის განხორციელების 2019 წლის ეროვნული სამოქმედო გეგმა.

რეგულარულად მიმდინარეობს ვებ-გვერდის www.dcfta.gov.ge განახლება. საიტზე შენიშვნებისთვის გასაჯაროვდა საკანონმდებლო აქტების პროექტები სანიტარულ, ფიტოსანიტარულ და ვაჭრობაში ტექნიკური ბარიერების სფეროებში.

მიმდინარე წლის 6 თვის მდგომარეობით, სსიპ - აწარმოე საქართველოში ფინანსებზე ხელმისაწვდომობის და ტექნიკური მხარდაჭერის მიმართულებით დაეხმარა 72 ბიზნეს პროექტს. მათ შორის 7-მა ბენეფიციარმა ისარგებლა ტექნიკური დახმარების კომპონენტით (2

¹ <https://www.geostat.ge/media/25553/sagonlit-sagareo-vachroba-sagartveloshi-19.08.2019-%28geo%29.pdf>

სასტუმრო, 5 საწარმო), ხოლო 65 არის ახალი პროექტი, რომელთაგან 27 არის სასტუმრო და 38 საწარმო. აღნიშნული ახალი 65 პროექტის ჯამური ინვესტიციის მოცულობა აჭარბებს 119 მლნ. ლარს და ამ პროექტების ფარგლებში დამატებით შეიქმნება 1240-ზე მეტი ახალი სამუშაო ადგილი.

გრძელდება ევროპის მეწარმეთა ქსელში (EEN) ქართველ მეწარმეთა მონაწილეობის ხელშეწყობა. ამ ეტაპისთვის EEN-ის პლატფორმაზე განთავსდა ქართული კომპანიების 3 ახალი კომერციული წინადადება. ასევე, მოხდა ორი ქართული კომპანიის დაკავშირება ევროპელ ბიზნეს პარტნიორებთან.

2019 წლის ორი კვარტლის მდგომარეობით, DCFTA-სთან დაკავშირებით კონსულტაცია გაეწია სსიპ - აწარმოე საქართველოში სააგენტოს 100 ბენეფიციარსა და დაინტერესებულ პირს, მათ შორის სათამაშოების მწარმოებელ 8 კომპანიას, საფეიქრო ინდუსტრიაში მომუშავე 27 კომპანიას, არქიტექტურისა და დიზაინის სფეროში მოღვაწე 15 კომპანიას, „აწარმოე საქართველოში“ პროგრამის 20 ბენეფიციარს და 30 ინდივიდუალურ პირს.

აქტიურად მიმდინარეობს ევროკავშირის წევრ ქვეყნებში **სავაჭრო გამოფენებში ქართველი ექსპორტიორების მონაწილეობის ხელშეწყობა**, ქართული პროდუქციის პოპულარიზაცია და ახალი ბიზნეს-კონტაქტების დამყარება ბაზრის დივერსიფიკაციის მიზნით. 2019 წლის პირველი ორი კვარტლის მონაცემებით, სააგენტოს დახმარებით, ჯამში 11 საერთაშორისო გამოფენა/ ღონისძიებაში მონაწილეობა მიიღო 80-მა ქართულმა კომპანიამ.

ვაჭრობაში ტექნიკური ბარიერების სფეროში საკანონმდებლო დაახლოების პროცესის ფარგლებში მომზადდა მთავრობის დადგენილებების პროექტები „ტექნიკური რეგლამენტი ფეტქებადსაშიშ გარემოში გამოსაყენებელი მოწყობილობებისა და სისტემების შესახებ“, „რადიო-აპარატურის შესახებ ტექნიკური რეგლამენტის დამტკიცების თაობაზე“ და „ტექნიკური რეგლამენტი სათამაშოების უსაფრთხოების შესახებ“. აღნიშნული პროექტები გასაჯაროვდა შენიშვნებისათვის და ასევე, გაიმართა სათამაშოების შესახებ რეგლამენტის განხილვა ბიზნეს სექტორთან და სხვა დაინტერესებულ პირებთან. გრძელდება მუშაობა ამ მიმართულებით 2018-2020 წლების DCFTA-ს განხორციელების გეგმით გათვალისწინებულ დირექტივებთან/რეგულაციებთან დაახლოების მიზნით.

სტანდარტებისა და მეტროლოგიის ეროვნული სააგენტოს მიერ საქართველოს სტანდარტად (სსტ) სულ დარეგისტრირდა 92 სტანდარტი, მათ შორის: სსტ ისო (საერთაშორისო სტანდარტი) - 31; სსტ იეკ (საერთაშორისო ელექტროტექნიკური კომისია) - 1; სსტ ენ (ევროპული სტანდარტი) - 60.

2019 წლის იანვარში ევროპის აკრედიტაციის თანამშრომლობის (EA) მიერ განხორციელდა საქართველოს აკრედიტაციის ცენტრის შეფასება **აკრედიტაციის ახალი სფეროს** - აკრედიტირებული სამედიცინო ლაბორატორიების აღიარების მიზნით. შეფასება ჩატარდა

წარმატებით, შედეგების განხილვა და ახალი სფეროს აღიარება დაგეგმილია EA-ს კომიტეტზე, რომლის გამართვა დაგეგმილია მიმდინარე წლის ოქტომბერში.

სანიტარულ და ფიტოსანიტარულ სფეროში საკანონმდებლო დაახლოების ნუსხის შესაბამისად, 6 თვის მონაცემებით დამტკიცდა/შემუშავდა:

- „დეკორატიული მცენარეების გასამრავლებელი მასალის ბაზარზე განთავსების პირობების დამტკიცების თაობაზე“ საქართველოს მთავრობის 2019 წლის 22 აპრილის N199 დადგენილება.
- „ცხოველის საკვების ჰიგიენის წესის დამტკიცების თაობაზე“ საქართველოს მთავრობის დადგენილების პროექტი.
- „ტექნიკური რეგლამენტის - საკვებდანამატების სპეციფიკაციების დამტკიცების შესახებ“ საქართველოს მთავრობის დადგენილების პროექტი.
- „ტექნიკური რეგლამენტი - მარცვლოვნებსა და მარცვლოვნების გადამუშავებით დამზადებულ პროდუქტებში T-2 და HT-2 ტოქსინების არსებობის შესახებ“ საქართველოს მთავრობის დადგენილების პროექტი.
- „მოთხოვნები გენეტიკურად მოდიფიცირებული სურსათისა და ცხოველის საკვების შესახებ“ საქართველოს მთავრობის 2018 წლის 16 ნოემბრის N549 დადგენილებაში ცვლილების შეტანის შესახებ“ საქართველოს მთავრობის დადგენილების პროექტი.
- „მოთხოვნები სურსათთან შეხებისათვის განკუთვნილი მასალებისა და საგნების მიმართ“ საქართველოს მთავრობის 2018 წლის 5 ივნისის N317 დადგენილებაში ცვლილების შეტანის შესახებ“ საქართველოს მთავრობის დადგენილების პროექტი.

გრძელდება სურსათის უვნებლობის, ვეტერინარიისა და მცენარეთა დაცვის მიმართულებით **დიაგნოსტიკის ახალი მეთოდების დანერგვა** და აკრედიტაციის სფეროს გაფართოება. 2019 წლის პირველი 6 თვის მდგომარეობით, სურსათის უვნებლობის მიმართულებით დაინერგა ორი ახალი მეთოდი; ვეტერინარიის მიმართულებით - ერთი; ხოლო მცენარეთა დაცვის მიმართულებით - ხუთი.

მიმდინარე წლის 28 ივნისს საქართველოს პარლამენტმა მიიღო **საქართველოს ახალი საბაჟო კოდექსი**, რომელიც **2019 წლის 1 სექტემბრიდან ამოქმედდა**. კოდექსის შემუშავების პროცესში ჩართული იყო ევროკავშირის საგადასახადო და საბაჟო საკითხების დირექტორატი (DGTAXUD). ევროკომისიასთან შეთანხმების საფუძველზე, აღნიშნული კოდექსი შემუშავებულ იქნა ე.წ. „Union Customs Code“-ის შესაბამისად, რომელმაც ჩაანაცვლა DCFTA-ის ფარგლებში განსაზღვრული ე.წ. „Community Customs Code“.

შემუშავებულია საქართველოს კანონპროექტი **„ელექტრონული კომერციის შესახებ“**, მომზადდა ევროკავშირის სამართლებრივ აქტთან შესაბამისობის ცხრილი და ამ ეტაპზე მიმდინარეობს კანონპროექტის დახვეწის სამუშაოები.

ევროკომისიასთან კონსულტაციების შემდგომ, დაიხვეწა "ფოსტის შესახებ" კანონპროექტი და მათი შენიშვნები აისახა აღნიშნულ კანონპროექტში. დაგეგმილია კანონპროექტისა და მისი თანმდევი კანონპროექტების წარდგენა საქართველოს პარლამენტისთვის 2019 წელს.

მომზადებულია ცვლილებების პროექტი საქართველოს კანონში **„ელექტრონული კომუნიკაციების შესახებ“**, გახორციელდა კერძო სექტორის შენიშვნების და კომენტარების შეგროვება/ანალიზი. ახლო პერიოდში ჩატარდება დამატებითი კონსულტაციები კერძო სექტორთან და დაინტერესებულ მხარეებთან.

სახელმწიფო შესყიდვების სააგენტოს ფარგლებში შექმნილმა სამუშაო ჯგუფმა დაასრულა საერთაშორისო ორგანიზაციებისა და საერთაშორისო ფინანსური ინსტიტუტების მიერ **სახელმწიფო შესყიდვების შესახებ ახალ კანონპროექტთან** დაკავშირებით მომზადებული შენიშვნების განხილვა, რის შემდეგაც ისინი აისახა აღნიშნულ კანონპროექტში. მიმდინარეობს შიდა სამთავრობო კონსულტაციები, რომლის ფარგლებშიც გამოკვეთილი შენიშვნები და მოსაზრებები აისახება კანონპროექტში.

საჯარო შესყიდვების სფეროს კომპლექსური რეფორმის ფარგლებში, სახელმწიფო შესყიდვების სააგენტოს მიერ მომზადდა საკანონმდებლო ცვლილებების პროექტი **საჯარო შესყიდვებთან დაკავშირებული დავების განხილვის საბჭოს** ახალი ინსტიტუციური მოწყობის შესახებ, რომელიც უზრუნველყოფს საბჭოს დამოუკიდებლობისა და მიუკერძოებლობის გაზრდილ ხარისხს. აღნიშნულთან დაკავშირებით მიმდინარეობდა ინტენსიური თემატური კონსულტაციები ევროკომისიის (DG GROW), OECD SIGMA-სა და Twinning-ის პროექტის კონსულტანტებთან. ახალ საკანონმდებლო ცვლილებებთან დაკავშირებით წინასწარი პრეზენტაცია გაიმართა ასევე, საქართველოს პარლამენტში. ამჟამად მიმდინარეობს საჯარო შესყიდვებთან დაკავშირებული დავების განხილვის საბჭოს შესახებ საკანონმდებლო ცვლილებების განხილვის ბოლო ეტაპი.

კონკურენციის სააგენტოში გრძელდება **კონკურენციის პოლიტიკის** ადვოკატირება, საჯარო და კერძო სექტორის წარმომადგენლებისათვის ინფორმაციული შეხვედრებისა და სემინარების ჩატარება. 2019 წლის პირველ ნახევარში ამ მიზნით ჩატარდა 9 ღონისძიება. ღონისძიებების სამიზნე ჯგუფს წარმოადგენდნენ მოსამართლეები, ადვოკატთა ასოციაციის წევრები, ადგილობრივი თვითმმართველობების, სადაზღვევო და ფარმაცევტული სექტორის, მარეგულირებელი ორგანოების, ბიზნეს ასოციაციების, საკონსულტაციო კომპანიების წარმომადგენლები, სტუდენტები და სხვა დაინტერესებული პირები.

ინტელექტუალური საკუთრების უფლებების დაცვის მიმართულებით საზოგადოებრივი ცნობიერების ამაღლების მიზნით, სსიპ - საქართველოს ინტელექტუალური საკუთრების ეროვნული ცენტრი - „საქპატენტის“ მიერ აქტიურად გრძელდება სემინარებისა და სამუშაო შეხვედრების ჩატარება.

2019 წლის თებერვალში „ტყის კოდექსის“ კანონპროექტი განსახილველად წარედგინა საქართველოს პარლამენტს. მიმდინარეობდა პარლამენტის საკომიტეტო მოსმენები. ამასთან, შემუშავებულია „ტყით სარგებლობის წესის დამტკიცების შესახებ“, „ტყის აღრიცხვისა და მონიტორინგის წესის დამტკიცების შესახებ“ და „ტყის დაცვის, მოვლის და აღდგენის წესის დამტკიცების შესახებ“ საქართველოს მთავრობის დადგენილებების პროექტების პირველადი სამუშაო ვერსიები, რომელთა გადამუშავება ტყის კოდექსის კანონპროექტთან შესაბამისობაში მოსაყვანად დაიწყება კოდექსის პარლამენტის მიერ მიღების შემდეგ.

თევზჭერის ელექტრონული მონიტორინგის სისტემა დანერგილია საქართველოს შავი ზღვის აკვატორიაში, ხოლო მისი პარამეტრების შესაბამისობა ევროპის სტანდარტებთან უზრუნველყოფილი იქნება ხმელთაშუა ზღვის თევზჭერის გენერალური კომისიის (GFCM) ტექნიკური დახმარების საფუძველზე. გარემოსდაცვითი ზედამხედველობის დეპარტამენტი განაგრძობს მუშაობას იმ გემების რაოდენობის გაზრდის მიზნით, რომლებიც აღჭურვილი იქნებიან თევზჭერის ელექტრონული მონიტორინგის სისტემით. მიმდინარეობს თევზის რესურსის მარაგის და თევზჭერისათვის დასაშვები შესაბამისი კვოტების გაანგარიშების და დადგენის მეთოდოლოგიების დაახლოება ევროკავშირის და GFCM-ის სტანდარტებთან და მოთხოვნებთან.

5. ეკონომიკური თანამშრომლობა

წინასწარი შეფასებით, 2019 წლის ივნისში წინა წლის ანალოგიურ პერიოდთან შედარებით რეალური მთლიანი შიდა პროდუქტის (მშპ) ზრდის 5.0 პროცენტი დაფიქსირდა, ხოლო 2019 წლის პირველი ექვსი თვის საშუალო რეალური ზრდა 4.9 პროცენტით განისაზღვრა.¹

შემუშავებულ იქნა საკანონმდებლო პაკეტი და ჩატარებულ იქნა საჯარო კონსულტაციები „მეწარმეთა შესახებ“ საქართველოს კანონზე, რომელშიც ასახულია ასოცირების შეთანხმების XXVIII დანართით გათვალისწინებული ევროკავშირის სამართლებრივი აქტები საკორპორაციო სამართლის მიმართულებით. 2019 წლის ბოლომდე იგეგმება საკანონმდებლო პაკეტის წარდგენა საქართველოს პარლამენტში.

მომზადდა და საქართველოს პარლამენტს წარედგინა სახელმწიფო აუდიტის სამსახურის მოხსენება "2018 წლის სახელმწიფო ბიუჯეტის წლიური შესრულების შესახებ" მთავრობის ანგარიშზე.

2019 წლის აუდიტორული საქმიანობის გეგმით განსაზღვრული ყველა აუდიტი მიმდინარეობს აუდიტის მართვის სისტემის (AMS) გამოყენებით. დასრულებულია 3 და მიმდინარეობს 12 ფინანსური აუდიტი; დასრულებულია 1 და მიმდინარეობს 32 შესაბამისობის აუდიტი, მათ შორის მიმდინარეობს 3 უწყებათშორისი შესაბამისობის აუდიტი.

¹ https://www.geostat.ge/media/25311/ekonomikuri-zrda_31.07.2019-%28geo%29.pdf

ეროვნულ ანგარიშთა სისტემის ახალი მეთოდოლოგიის (SNA-2008) დანერგვასთან დაკავშირებით, სტატისტიკის ეროვნული სამსახური აწარმოებს მუშაობას საერთაშორისო სავალუტო ფონდისა და დანიის სტატისტიკის (ტვინინგის პროექტის ფარგლებში) ექსპერტების ჩართულობით. ახალი მეთოდოლოგიით დათვლილი მონაცემები გამოქვეყნდება 2019 წლის ნოემბერში.

სადაზღვევო ბროკერების (შუამავლების) საქმიანობის საზედამხედველო ჩარჩოს შემდგომი სრულყოფის მიზნით, საბროკერო (საშუამავლო) საქმიანობის განმახორციელებელი პირების მიმართ მოთხოვნის დადგენის საკითხის გარშემო მომზადდა კანონპროექტი "დაზღვევის შესახებ" კანონში ცვლილების შესახებ. მოცემული პარლამენტის პლენარულ სხდომაზე განხილულია მესამე მოსმენით.

მომზადებულია „საქართველოში რეგისტრირებული ავტოსატრანსპორტო საშუალების მფლობელის სამოქალაქო პასუხისმგებლობის სავალდებულო დაზღვევის შესახებ“ კანონპროექტი და მიმდინარეობს საპარლამენტო განხილვები.

2002 წლის 16 დეკემბრის ევროპარლამენტისა და საბჭოს 2002/87/EC დირექტივის, ფინანსურ კონგლომერატში საკრედიტო ინსტიტუტების, სადაზღვევო კომპანიებისა და საინვესტიციო კომპანიების დამატებითი ზედამხედველობის შესახებ მოთხოვნების შესრულების მიზნით, შემუშავდა „ფინანსურ კონგლომერატში შემავალი რეგულირებული საწარმოების დამატებითი ზედამხედველობის შესახებ“ საქართველოს კანონის პროექტი და მიმდინარეობს კონსულტაციები მისი პარლამენტში ოფიციალური წარდგენის მიზნით.

რეგულირებულ ბაზარზე სავაჭროდ დაშვებული ფასიანი ქაღალდების ემიტენტებზე ინფორმაციის გამჭვირვალობის მოთხოვნათა ჰარმონიზაციის შესახებ 2004 წლის 15 დეკემბრის ევროპარლამენტისა და საბჭოს 2004/109/EC დირექტივასთან დაახლოების მიზნით მომზადებულია "ფასიანი ქაღალდების ბაზრის შესახებ" საქართველოს კანონში ცვლილებებისა და დამატებით კანონქვემდებარე აქტების პროექტები (მათ შორის, კანონპროექტის განმარტებითი ბარათი და შესაბამისობის ანალიზი). ცვლილებები ასევე მოიცავს ევროპარლამენტისა და საბჭოს 2014 წლის 16 აპრილის (EU) No 596/2014 რეგულაციით (საბაზრო ძალაუფლების ბოროტად გამოყენების შესახებ) გათვალისწინებულ საკითხებს. კანონპროექტი გაეგზავნა ბაზრის მონაწილეებს, რომელთაც წარმოადგინეს თავიანთი კომენტარები შემოთავაზებულ ცვლილებებზე, ასევე მოხდა კანონპროექტის განხილვა საქართველოს ეკონომიკისა და მდგრადი განვითარების სამინისტროსთან. კანონპროექტისა და შესაბამისი კანონქვემდებარე აქტის პროექტის შემუშავების პროცესში ეროვნულ ბანკს მრჩევლის/ექსპერტის რანგში დახმარებას უწევდა ბელგიის ფინანსური სერვისებისა და ბაზრების საზედამხედველო ორგანოს (FSMA) წარმომადგენელი. ამ ეტაპზე კანონპროექტი არ არის წარდგენილი მთავრობისათვის ოფიციალურად, თუმცა წარდგენა იგეგმება, პარლამენტის საშემოდგომო სესიის დაწყებისას.

მომზადებულია „ფინანსურ კონგლომერატში შემავალი რეგულირებული საწარმოების დამატებითი ზედამხედველობის შესახებ“ საქართველოს კანონის პროექტი და მიმდინარეობს კონსულტაციები მისი პარლამენტში ოფიციალური წარდგენის მიზნით.

კანონპროექტი მიმოქცევად ფასიან ქაღალდებში კოლექტიური ინვესტიციების განსახორციელებლად შექმნილ საწარმოსთან (UCITS) მიმართებაში, კანონების, რეგულაციებისა და ადმინისტრაციული დებულებების კოორდინაციის შესახებ 2009 წლის 13 ივლისის ევროპარლამენტისა და საბჭოს 2009/65/EC დირექტივასთან დაახლოების მიზნით, რომლის განხილვა მიმდინარეობდა დაინტერესებული მხარეების აქტიური ჩართულობით.

2002 წლის 23 სექტემბრის ევროპარლამენტისა და საბჭოს მომხმარებლის ფინანსური მომსახურების დისტანციური მარკეტინგის შესახებ N2002/65/EC და 2008 წლის 23 აპრილის ევროპარლამენტისა და საბჭოს მომხმარებელთა საკრედიტო შეთანხმებების შესახებ N2008/48/EC დირექტივებთან დაახლოების მიზნით მიღებულია საქართველოს ეროვნული ბანკის პრეზიდენტის N151/04 ბრძანება „ფინანსური ორგანიზაციების მიერ მომსახურების გაწევისას მომხმარებელთა უფლებების დაცვის წესის დამტკიცების შესახებ“, სადაც ნაწილობრივ არის ასახული დირექტივით გათვალისწინებული მოთხოვნები, დანარჩენ ნაწილზე მიმდინარეობს მუშაობა, რის საფუძველზეც დასრულებულია შესაბამისობის ანალიზი და მუშავდება ნორმატიული აქტის სამუშაო ვერსია.

სახელმწიფო შიდა ფინანსური კონტროლის სისტემის განვითარების შესახებ 2018 წლის კონსოლიდირებული წლიური ანგარიში წარედგინა საქართველოს მთავრობას.

USAID-ის პროექტის ”დემოკრატიული მმართველობის ინიციატივა (GGI) საქართველოში“ მხარდაჭერით, საერთაშორისო ექსპერტების მიერ გადამზადებული ადგილობრივი შიდა აუდიტორების/ტრენერების ჩართულობით განხორციელდა ტრენინგი „შიდა აუდიტის როლი თაღლითობის აღკვეთასა და თაღლითობის ფაქტის გამოვლენის პროცესში“ ბათუმსა და თბილისში, რის შედეგადაც გადამზადდა 50-მდე შიდა აუდიტორი.

2019 წლის I კვარტალში სახელმწიფო და კერძო სექტორის უძრავ-მომრავი ქონების ელექტრონული აუქციონის ვებგვერდს eauction.ge-ს დაემატა ახალი ფუნქცია, რომელიც გულისხმობს არშემდგარი აუქციონების ავტომატურ, განმეორებით (სამეტაპიანი) გამოცხადებას ვებგვერდზე. აუქციონის ავტომატური რეჟიმის მეშვეობით გამოცხადება ხდება ქონების პირველადი შეფასებით, ხოლო შემდგომი სამი აუქციონი ცხადდება ავტომატურად შესაბამისი ფასდაკლებებით. ახალი ფუნქციის დანერგვის შედეგად აუქციონების მონაცემების ასახვაც ხდება პარალელურად უკვე საწყობის მართვის სისტემაშიც (ERP). ასევე, მომხმარებელთა მოთხოვნებისა და საჭიროებებიდან გამომდინარე დაემატა და დაიხვეწა სხვადასხვა სახის რეპორტი/ფუნქციონალი.

6. თანამშრომლობის სხვა სფეროები

6.1 ტრანსპორტი

ევროპარლამენტისა და საბჭოს 2000/59/EC დირექტივასთან (ნავსადგურში გემების მიერ გენერირებული და ტვირთების ნარჩენების მიმღები მოწყობილობების შესახებ) საქართველოს კანონმდებლობის დაახლოების მიზნით, „საზღვაო ტრანსპორტის სფეროში, საქართველოსა და ევროკავშირის შორის ასოცირების შეთანხმების დანერგვის მხარდაჭერის პროექტის ფარგლებში“ - ევროპის საზღვაო უსაფრთხოების სააგენტოს(EMSA) ექსპერტების მიერ მომზადდა დირექტივის საჭიროებების შეფასება. ამ ეტაპისთვის მიმდინარეობს დოკუმენტის შესწავლა აღნიშნული დირექტივის პრაქტიკაში დასაწერად.

საბჭოს 1999/63/EC დირექტივასთან, რომელიც ეხება “მეზღვაურთა სამუშაო დროის ორგანიზების შესახებ” შეთანხმებას, საქართველოს კანონმდებლობის დაახლოების მიზნით, მიმდინარე წლის ბოლომდე, დაგეგმილია "საზღვაო შრომის კონვენცია 2006"-თან მიერთება, რომლის შესაბამისად, მოხდება 1999/63/EC დირექტივის დანერგვა, აგრეთვე, მიმდინარეობს მუშაობა "მეზღვაურთა დასაქმების შესახებ" საქართველოს კანონის პროექტზე, სადაც გათვალისწინებულ იქნება აღნიშნული დირექტივის მოთხოვნები.

სამოქალაქო აეროდრომებზე საავიაციო უშიშროების მიმართ დადგენილი სტანდარტული მოთხოვნებისგან გამონაკლისის დადგენის შესახებ, ევროპის პარლამენტის და საბჭოს 1254/2009 რეგულაციის მოთხოვნებთან საქართველოს კანონმდებლობის დაახლოების მიზნით, მიმდინარეობს მუშაობა რეგულაციის დანერგვაზე, რაც აისახება სააგენტოს დირექტორის 2013 წლის 30 დეკემბრის N267 ბრძანებაში - „აეროდრომის სერტიფიცირების წესის დამტკიცების შესახებ“.

ევროპის პარლამენტის და საბჭოს 2017/373 რეგულაციით გათვალისწინებულ სააერონავიგაციო მომსახურების საწარმოს სერტიფიცირების მოთხოვნებთან საქართველოს კანონმდებლობის დაახლოების მიზნით, დამტკიცებულია სააგენტოს დირექტორის 2019 წლის 12 ივნისის N119 ბრძანება-სააერონავიგაციო მომსახურების საწარმოს სერტიფიცირების წესის დამტკიცების შესახებ.

საბჭოს 2000 წლის 27 ნოემბრის №2000/79 დირექტივასთან (ევროპის სამოქალაქო ავიაციის სფეროში მობილური მუშაკების სამუშაო დროის ორგანიზების შესახებ) საქართველოს კანონმდებლობის დაახლოების მიზნით, დირექტივის მოთხოვნები ასახულია სსიპ - სამოქალაქო ავიაციის სააგენტოს დირექტორის N168 ბრძანებაში - „სამოქალაქო ავიაციის სამუშაო დროის და ფრენის დროის ნორმების“ დამტკიცების შესახებ, რომელიც ძალაში შედის 2021 წლის 1 ოქტომბრიდან.

ევროპარლამენტისა და საბჭოს 2003 წლის 15 ივლისის №2003/59/EC დირექტივასთან (ტვირთის გადაზიდვისა ან მეზღვაურთა გადაყვანის მიზნით, გარკვეული სახის ავტოსატრანსპორტო საშუალებების მძღოლების თავდაპირველი კვალიფიკაციისა და პერიოდული ტრენინგების შესახებ) საქართველოს კანონმდებლობის დაახლოების მიზნით, მძღოლთა პრაქტიკული მომზადებისათვის საჭირო ტრენინგ-ცენტრის საპროექტო სამუშაოები დასრულებულია.

ევროპარლამენტისა და საბჭოს N913/2010 რეგულაციასთან **(კონკურენტული ტვირთისთვის ევროპული სარკინიგზო ქსელის თაობაზე)** საქართველოს კანონმდებლობის დაახლოების მიზნით, რეგულაციის დეტალური შესწავლისა და ანალიზის შედეგად დადგინდა, რომ საქართველოს კანონმდებლობაში ცვლილებების განხორციელება აუცილებელი არ არის. რეგულაცია შესაძლებელია ჩაითვალოს შესრულებულად, ვინაიდან საქართველო მონაწილეობს რამდენიმე საერთაშორისო სარკინიგზო დერეფანში, რომელთა წევრებიც ასევე არიან ევროკავშირის წევრი ქვეყნები (მაგალითად, TRACECA, TITR, Viking).

ევროპარლამენტისა და საბჭოს 2008 წლის 24 სექტემბრის №2008/68/EC დირექტივასთან (სახიფათო ტვირთების შიდა სახმელეთო გადაზიდვის შესახებ) საქართველოს კანონმდებლობის დაახლოების მიზნით, საერთაშორისო და შიდა გადაზიდვებში ჩართული ყველა სატრანსპორტო საშუალებისთვის, საქართველოს მთავრობის 2019 წლის 15 თებერვლის N89 დადგენილებით დამტკიცდა ტექნიკური რეგლამენტი - „**სატრანსპორტო საშუალებებით სახიფათო ტვირთების გადაზიდვის წესის**“ დამტკიცების თაობაზე“, რომელიც ეფუძნება 2008/68/EC დირექტივით გათვალისწინებულ მოთხოვნებს. აღსანიშნავია, რომ შიდა გადაზიდვებზე ხსენებული ტექნიკური რეგლამენტი გავრცელდება 1-ლი სექტემბრიდან.

2009 წლის 21 ოქტომბრის ევროპარლამენტისა და საბჭოს (EC) №1071/2009 რეგულაციის მე-3 მუხლის, პირველი პუნქტის ა) ბ) გ) და დ) ქვეპუნქტებით გათვალისწინებული ვალდებულების შესრულების მიზნით, **“სავტომობილო ტრანსპორტის შესახებ”** კანონში მომზადებულია ცვლილებების შესახებ ნორმატიული აქტის პროექტი, რომელიც ეფუძნება 1071/2009 რეგულაციის მოთხოვნებს.

ევროპარლამენტისა და საბჭოს 2007 წლის 23 ოქტომბრის №1370/2007 რეგულაციასთან (რკინიგზით მგზავრთა გადაყვანის სახელმწიფო მომსახურების შესახებ) საქართველოს კანონმდებლობის დაახლოების მიზნით, სარკინიგზო კოდექსში ცვლილების შეტანის პროექტი ინიცირებულია და მიმდინარეობს მისი განხილვა პარლამენტში.

6.2 თანამშრომლობა ენერგეტიკის სფეროში

№2010/30/EU დირექტივასთან ეტიკეტირების და პროდუქციის შესახებ სხვა სტანდარტული ინფორმაციის მითითებით, ენერგომომხმარებლის პროდუქტების მიერ ენერჯისა და სხვა წყაროების მოხმარების ინდიკაციის შესაბამისად, დანიის სამეფოს დახმარებით **მომზადდა „ენერგო ეტიკეტირების შესახებ“ კანონის პროექტი**, რომელიც წარდგენილია პარლამენტში განსახილველად.

№ 2012/27/ EU ენერგოეფექტურობის შესახებ დირექტივასთან, რომელსაც ცვლილებები შეაქვს № 2009/125/EC და № 2010/30/EU დირექტივებში და აუქმებს დირექტივებს № 2004/8/EC და №2006/32/EC, საქართველოს კანონმდებლობის დაახლოების მიზნით **მომზადდა „ენერგოეფექტურობის შესახებ“ კანონის პროექტი**, რომელიც მოწონებულ იქნა საქართველოს მთავრობის მიერ. ამჟამად კონსულტაციები მიმდინარეობს პარლამენტის იურიდიულ და

საბიუჯეტო კომიტეტებთან კანონის პროექტის პარლამენტში წარდგენის პროცედურების უზრუნველსაყოფად.

ამასთან, №2009/28/EC დირექტივასთან, განახლებადი ენერჯის წყაროებიდან ენერჯის გამოყენების ხელშეწყობის შესახებ, რომლითაც ცვლილებები შევიდა და მოგვიანებით გაუქმდა დირექტივა № 2001/77/ EC და დირექტივა № 2003/30/ EC, საქართველოს კანონმდებლობის დაახლოების მიზნით მომზადდა „განახლებადი წყაროებიდან ენერჯის წარმოებისა და გამოყენების წახალისების შესახებ“ კანონის პროექტი, რომელიც მოწონებულ იქნა საქართველოს მთავრობის მიერ და მიმდინარე წლის 24 ივლისს საქართველოს მთავრობის ადმინისტრაციამ წარადგინა პარლამენტში. ამჟამად მიმდინარეობს კანონპროექტის განხილვა.

ასოცირების შესახებ შეთანხმებიდან გამომდინარე აღებული ვალდებულების გათვალისწინებით, ეკონომიკისა და მდგრადი განვითარების სამინისტროს და სხვა პასუხისმგებელი უწყებების მიერ მომზადდა „ენერჯეტიკის და წყალმომარაგების შესახებ“ კანონპროექტი, რომელიც მოწონებული იქნა საქართველოს მთავრობის მიერ და წარდგენილია პარლამენტში სამომავლო განხილვებისთვის.

6.3 გარემოს დაცვა

მომზადებულია "წყლის რესურსების მართვის შესახებ" საქართველოს კანონის პროექტის საბოლოო ვერსია, რომელიც საქართველოს პარლამენტს წარედგინება 2019 წლის ბოლომდე.

„სამრეწველო ემისიების შესახებ“ საქართველოს კანონის პროექტი და მისგან გამომდინარე კანონპროექტები დაგზავნილია სამთავრობო უწყებებში განსახილველად.

შემუშავებულია „ბიომრავალფეროვნების შესახებ კანონპროექტის“ საბოლოო ვერსია, ამჟამად მიმდინარეობს მუშაობა კანონპროექტის დასახვეწად, რათა უახლოეს მომავალში მოხდეს მისი საქართველოს მთავრობისათვის წარდგენა.

სრულდება მუშაობა "გარემოსდაცვითი პასუხისმგებლობის შესახებ" საქართველოს კანონის პროექტის საბოლოო ვერსიაზე. "გარემოსთვის მიყენებული ზიანის გამოთვლის მეთოდოლოგიის დამტკიცების შესახებ" კანონქვემდებარე აქტის პროექტის შემუშავება ხდება უცხოელი ექსპერტების დახმარებით, რომლებიც ამ ეტაპზე ახორციელებენ ინფორმაციის მოძიებასა და შესწავლას.

მომზადდა საქართველოს კანონის პროექტი „ატმოსფერული ჰაერის დაცვის შესახებ“ საქართველოს კანონში ცვლილების შეტანის თაობაზე, რომელიც მოწონებულ იქნა საქართველოს მთავრობის მიერ და დასამტკიცებლად წარდგენილ იქნა საქართველოს პარლამენტში.

შექმნილია ატმოსფერული ჰაერის ხარისხის ვებპორტალი air.gov.ge, სადაც ხელმისაწვდომია უახლესი ინფორმაცია, როგორც ატმოსფერული ჰაერის ხარისხის, ისე მისი გაუმჯობესების ღონისძიებების შესახებ.

ევროპის ველური ბუნებისა და ბუნებრივი ჰაბიტატების დაცვის შესახებ კონვენციის სამდივნოში ზურმუხტის შერჩეული კანდიდატი ტერიტორიების დეზიგნირებისა და კანდიდატ საიტებად ნომინირებისათვის, ზურმუხტის 7 კანდიდატ ტერიტორიაზე ამჟამად მიმდინარეობს სამეცნიერო კვლევები. ასევე, იგეგმება კვლევები შეთავაზებულ ტერიტორიებზე, რის შემდეგაც შეირჩევა ტერიტორიები ოფიციალურად დასამტკიცებლად. ტერიტორიების ოფიციალურად დამტკიცება ხდება ყოველი წლის ბოლოს ბერნის კონვენციის მუდმივმოქმედი კომიტეტის შეხვედრაზე.

შემუშავებულია “გარემოსდაცვითი ინფორმაციის ხელმისაწვდომობის წესის” სამუშაო ვერსია. მიღებულია სხვადასხვა უწყებისგან (12 უწყება) შენიშვნები და წინადადებები (ჯამში 43). მომზადებულია შენიშვნების ფურცელი, რომელშიც აღწერილია შენიშვნების ასახვის მდგომარეობა. საქართველოს მთავრობის დადგენილების პროექტი “გარემოსდაცვითი ინფორმაციის ხელმისაწვდომობის წესის დამტკიცების შესახებ” გადაგზავნილია გარემოს დაცვისა და სოფლის მეურნეობის სამინისტროს იურიდიულ დეპარტამენტში საქართველოს მთავრობისთვის წარსადგენად.

საზღვაო გარემოს სტატუსის რეგულარული შეფასების ფარგლებში, საანგარიშო პერიოდში ყოველთვიურად ხორციელდებოდა სავსე ექსპედიცია შავი ზღვის საქართველოს სანაპიროს მონიტორინგის 4 მუდმივ სადგურზე ბაქტერიოლოგიური და ჰიდრობიოლოგიური სინჯების აღების მიზნით. 2019 წლის 1 ივლისის მდგომარეობით, აღებულია სულ 106 სინჯი, მათ შორის 48 ბაქტერიოლოგიური და 58 ჰიდრობიოლოგიური (24 ფიტოპლანქტონის, 22 ზოოპლანქტონის და 12 მაკროფიტობენტოსის სინჯები). დამუშავდა მონიტორინგული კვლევების შესახებ ინფორმაცია და მომზადდა პირველი და მეორე კვარტლის ბიულეტენები, რომელიც საფუძვლად დაედება საზღვაო გარემოს სტატუსის შეფასების ანგარიშს.

"ევროკავშირის წყლის ინიციატივა პლიუსის" პროექტის ფარგლებში მომზადებულია ანგარიშები ალაზანი-იორის და ხრამი-დებედას სააუზო უბნების მახასიათებლების შესახებ.

გაეროს გარემოსდაცვითი პროგრამის მხარდაჭერით მზადდება კლიმატის ცვლილებისადმი "ადაპტაციის ეროვნული გეგმის" საპროექტო წინადადება კლიმატის მწვანე ფონდში წარსადგენად.

ევროკავშირისა და შვედეთის რადიაციული უსაფრთხოების ცენტრის ფინანსური მხარდაჭერით მიმდინარეობს პროექტი - „რადიოაქტიური ნარჩენების მართვა საქართველოში“. პროექტი მიზნად ისახავს საქართველოში არსებული რადიოაქტიური ნარჩენების ერთად თავმოყრას და შემდგომ მათი უსაფრთხოების კონტროლს. პროექტის ფარგლებში დაგეგმილია სიტუაციური ანალიზი, რადიაციული ნარჩენების საცავის შენობის პროექტირება და მშენებლობა.

"საქართველოში რადიოაქტიური ნარჩენების მოპყრობის ობიექტების განთავსებისათვის ადგილის შერჩევის შესახებ" ანგარიში მომზადებულია და წარდგენილია საქართველოს მთავრობისათვის გადაწყვეტილების მისაღებად.

6.4 სოფლის მეურნეობა და სასოფლო განვითარება

2019 წლის პირველ ნახევარში აგროდაზღვევის პროექტის ფარგლებში გაიცა 9,444 პოლისი, დაზღვეული მოსავლის ფართობი შეადგენს 10,563 ჰა-ს. დაზღვეული მოსავლის ღირებულება - 91,961,994 ლარს. სააგენტოს წილი სადაზღვეო პრემიაში შეადგენს 4,582,315 ლარს.

საანგარიშო პერიოდში შეღავათიანი აგროკრედიტის პროექტის ფარგლებში ბანკების მიერ გაცემულ იქნა 134,345,402 ლარის ოდენობის 2,161 სესხი. დაფინანსდა 41 ახალი, ან არსებული საწარმოს გაფართოება/გადაიარაღება/მოდერნიზება.

საანგარიშო პერიოდში, ახალ გახსნილ საწარმოებში თანამედროვე ტექნოლოგიების და მეთოდოლოგიების, სურსათის უვნებლობის მართვის საერთაშორისო სტანდარტების და სისტემების დანერგვის მიზნით (HACCP და ISO22000:2005) გაფორმდა ერთი ახალი ხელშეკრულება.

სასოფლო-სამეურნეო პროდუქტების გადამამუშავებელი და შემნახველი საწარმოების თანადაფინანსების პროექტის ფარგლებში 2019 წლის პირველ ნახევარში დამტკიცდა 5 პროექტი გადამამუშავებელი საწარმოების კომპონენტში, რომლის ჯამურმა ღირებულებამ შეადგინა 6,089,700 ლარი, საიდანაც თანადაფინანსება შეადგენს - 2,605,680 ლარს. შემნახველ საწარმოთა კომპონენტში დამტკიცდა 2 პროექტი, ჯამური ღირებულებით 2,511,317 ლარი, საიდანაც თანადაფინანსების მოცულობა შეადგენს - 1,200,000 ლარს. საანგარიშო პერიოდში დასრულდა 6 გადამამუშავებელი და 6 შემნახველი საწარმოს შექმნა.

მეწარმეების დახმარების პროექტის ფარგლებში კანონმდებლობის მოთხოვნებთან ადაპტაციის მიზნით - საგაზაფხულო კამპანიების დროს, ცხოველთა მფლობელებისათვის დასარიგებლად გამზადდა და სურსათის ეროვნული სააგენტოს რეგიონულ სამმართველოებს გადაეცათ ცხოველთა იდენტიფიკაცია-რეგისტრაციასთან დაკავშირებით 100 000 (ასი ათასი) ცალი საინფორმაციო ბუკლეტი, ქართულ, სომხურ და აზერბაიჯანულ ენებზე.

6.5 დასაქმება, სოციალური პოლიტიკა და თანაბარი შესაძლებლობები

2019 წლის 19 თებერვალს საქართველოს პარლამენტმა დაამტკიცა საქართველოს ორგანული კანონი „შრომის უსაფრთხოების შესახებ“, რომლის საფუძველზეც გაფართოვდა აღნიშნული კანონის მოქმედების სფერო. 2019 წლის 1 სექტემბრიდან რეგულაციები გავრცელდება ეკონომიკური საქმიანობის ყველა დარგის მიმართ. აგრეთვე, ზედამხედველ ორგანოს უფლება ეძლევა ნებისმიერ დროს, სასამართლოს ნებართვისა და წინასწარი შეტყობინების გარეშე

განახორციელოს შრომის უსაფრთხოების ნორმების შემოწმება; გამკაცრდა პასუხისმგებლობის ზომები ზედამხედველი ორგანოს საქმიანობისათვის ხელის შეშლისა და სამუშაო პროცესის შეჩერების შესახებ.

საქართველოს პარლამენტში 2019 წლის 19 თებერვალს დამტკიცდა საკანონმდებლო ცვლილებათა პაკეტი, რომელიც მოიცავს შემდეგ საკანონმდებლო აქტებს: საქართველოს ორგანული კანონი „საქართველოს შრომის კოდექსი“; საქართველოს კანონი „დისკრიმინაციის ყველა ფორმის აღმოფხვრის შესახებ“; საქართველოს კანონი „საჯარო სამსახურის შესახებ“ და საქართველოს კანონი „გენდერული თანასწორობის შესახებ“. ცვლილებები ითვალისწინებს პირთა თანასწორუფლებიანობის პრინციპის დაცვას შრომით და წინასახელშეკრულებო ურთიერთობებში, განათლების, სოციალური დაცვისა და ჯანმრთელობის დაცვის სფეროებში; ადგენს აკრძალვას პირისთვის მითითების მიცემის შემთხვევაში, განახორციელოს მესამე პირის მიმართ დისკრიმინაცია და დამსაქმებლის ვალდებულებას დაიცვას პირთა თანასწორუფლებიანობის პრინციპი, არამართო შრომით სახელშეკრულებო ურთიერთობებში, არამედ წინასახელშეკრულებო ურთიერთობებშიც, რაც გულისხმობს ვაკანსიის შესახებ განცხადების გამოქვეყნებისა და გასაუბრების ეტაპზე დისკრიმინაციის დაუშვებლობას რაიმე ნიშნით; დაზუსტდა შევიწროებისა და სექსუალური შევიწროების ცნებები არსებულ კანონმდებლობაში, ასევე აღნიშნული ტერმინების განმარტებები დაემატა „დისკრიმინაციის ყველა ფორმის აღმოფხვრის შესახებ“ საქართველოს კანონს.

2019 წლის ივნისის მდგომარეობით, შრომის ბაზრის მართვის საინფორმაციო სისტემაში რეგისტრაცია გაიარა სულ 286 075 სამუშაოს მაძიებელმა, მათ შორისაა 18 626 იძულებით გადაადგილებული პირი და 8003 შშმ პირი. სამუშაოს მაძიებელთა რეგიონული განაწილება ასეთია: თბილისი - 42 649, აჭარა - 26 377, გურია - 12 552, იმერეთი - 33 865, კახეთი - 27 277, სამეგრელო-ზემო სვანეთი - 24 607, სამცხე-ჯავახეთი - 8 847, ქვემო ქართლი - 23 875, შიდა ქართლი - 19 576, რაჭა-ლეჩხუმი - 3 624, მცხეთა-მთიანეთი - 7 142, სხვა (მისამართის გარეშე) – 17 750.

"სამუშაოს მაძიებელთა პროფესიული მომზადება-გადამზადებისა და კვალიფიკაციის ამაღლების სახელმწიფო პროგრამის" მოკლევადიანი გადამზადების კურსის ფარგლებში, რეგისტრაციის პროცესი გაიარა 1610 სამუშაოს მაძიებელმა, სწავლა დაიწყო 1420-მა ბენეფიციარმა, მათ შორის 98-მა დევნილმა. სახელმწიფო პროფესიულ საგანმანათლებლო დაწესებულებებში საგაზაფხულო მიღებაზე ჩარიცხულია 125 დევნილი. 2019 წლის იანვარში გამოვლინდა 2018 წლის პროფესიული მომზადება-გადამზადების პროგრამის კურსდამთავრებულთა მონიტორინგის შედეგები, რომლის მიხედვითაც დამატებით დასაქმებულია 319 სამუშაოს მაძიებელი, მათ შორის 4 შშმ პირი.

2019 წლის ივნისის ბოლოსთვის "დევნილთა პროფესიული განათლების ხელშეწყობის პროგრამის" ფარგლებში, 178 დევნილ სტუდენტს აქვს აქტიური ხელშეკრულება და უნაზღაურდება ტრანსპორტირების ხარჯი. პროგრამის მიმდინარეობის პერიოდში ჯამში დაფინანსებულია 576 ბენეფიციარი.

ამ ეტაპზე შერჩეულია 65 დევნილი ოჯახი, რომელთათვის გრანტის სახით ძირითადი საშუალებების (ტექნიკა-დანადგარი, სახელობო იარაღი) შესყიდვა და გადაცემა დაგეგმილია 2019 წლის III-IV კვარტალში. დევნილთა თვითდასაქმების ხელშეწყობის საგრანტო პროგრამის ფარგლებში, შერჩეულია პროფესიული სასწავლებლების 50 კურსდამთავრებული, რომლებსაც თვითდასაქმების მიზნით გადაეცემათ სახელობო იარაღები. 2019 წლის აპრილში ჩატარდა წინა წლის ბენეფიციართა კვლევა პროგრამის ეფექტიანობის შეფასების მიზნით. გამოვლინდა, რომ დაფინანსებულთა 75%-ს ყოველთვიური შემოსავალი გაეზარდათ საშუალოდ 100-დან 1000 ლარამდე.

„დასაქმების ხელშეწყობის მომსახურებათა განვითარების 2019 წლის სახელმწიფო პროგრამის“ (საშუამავლო მომსახურების გაწევის კომპონენტის) ფარგლებში, დამსაქმებლების მიერ წარმოდგენილი იქნა 5 142 სამუშაო ადგილი. ვაკანსიების შესახებ ინფორმაცია მიეწოდა სისტემაში რეგისტრირებულ სამუშაოს მაძიებლებს. ვაკანსიების ფარგლებში შეირჩა და დამსაქმებლებთან გაიგზავნა 3 516 სამუშაოს მაძიებელი. აქედან თბილისში - 1 708, ხოლო რეგიონებში-1 808. მათ შორის 286 იძულებით გადაადგილებული პირი და 195 შშმ პირი. სულ საშუამავლო მომსახურების ფარგლებში დასაქმდა 243 სამუშაოს მაძიებელი, მათ შორის, 11 შშმ პირი.

მოწყვლადი, დაბალკონკურენტუნარიანი ჯგუფების დასაქმების ხელშეწყობის ფარგლებში, მხარდაჭერითი დასაქმების კონსულტანტებმა შშმ პირთათვის მოიძიეს 106 ვაკანსია. შვიდ რაიონულ განყოფილებაში სულ 117 შშმ პირს გაეწია მხარდაჭერითი მომსახურება, დასაქმდა 9 შშმ პირი. დასაქმების კონსულტანტების მხარდაჭერით, სუბსიდირების კომპონენტში ჩაერთო 2 დამსაქმებელი და 2 ბენეფიციარი. მათ შორის 1 შშმ პირი.

2019 წლის 19 აპრილს, ჩატარდა დასაქმების ფორუმი შშმ პირებისათვის, სადაც მონაწილეობა მიიღო 20 დამსაქმებელმა და 71 შშმ პირმა. 2019 წლის 3 მაისს, ქ. თბილისში ჩატარებულ დასაქმების ფორუმში მონაწილეობა მიიღო 22 დამსაქმებელმა და 248 სამუშაოს მაძიებელმა;

31 მაისს, ქ.ბათუმში ჩატარდა დასაქმების ფორუმი, სადაც მონაწილეობა მიიღო 55 დამსაქმებელმა და 243 სამუშაოს მაძიებელმა.

სულ ფორუმებში მონაწილეობა მიიღო 119 დამსაქმებელმა და 807 სამუშაოს მაძიებელმა. დამსაქმებლებმა წარმოადგინეს 3000-ზე მეტი აქტიური ვაკანსია სხვადასხვა სფეროდან, მათ შორის: მომსახურების, გაყიდვების, სამშენებლო, ტურიზმის და სხვა სფეროებიდან. მიმდინარეობს უკუკავშირის მონიტორინგი.

„შრომის პირობების ინსპექტირების 2019 წლის სახელმწიფო პროგრამის“ ფარგლებში, საანგარიშო პერიოდში, ინსპექტირება ჩატარდა 154 კომპანიაში; **„შრომის უსაფრთხოების შესახებ“** საქართველოს ორგანული კანონის საფუძველზე 2019 წლის 1 იანვრიდან შემოწმდა 387 კომპანია.

იძულებითი შრომისა და შრომითი ექსპლუატაციის პრევენციის მიზნით „სახელმწიფო ზედამხედველობის განხორციელების წესის დამტკიცების შესახებ“ დადგენილების ფარგლებში, შრომის პირობების ინსპექტირების დეპარტამენტის მიერ განხორციელდა 100 კომპანიის ინსპექტირება, რომლის დროსაც ყურადღება ეთმობოდა ბავშვთა შრომის შესახებ კომპანიის წარმომადგენლების ცნობიერების ამაღლებას.

2019 წლის აპრილში შრომის საერთაშორისო ორგანიზაციის მიერ ჩატარდა პირველი სერტიფიცირებული (საერთაშორისო) ტრენინგი შრომითი მედიატორებისთვის საერთაშორისო საასწავლო ცენტრის- ITC/ILO- ტრენინგების მონაწილეობით.

2019 წლის 15 მარტს ჩატარდა აჭარის ავტონომიური რესპუბლიკის სოციალური პარტნიორობის სამმხრივი ტერიტორიული კომისიის სხდომა. სხდომაზე განხილული იქნა აჭარის ავტონომიური რესპუბლიკის სოციალური პარტნიორობის სამმხრივი ტერიტორიული კომისიის 2019-2020 წლების სამოქმედო გეგმის პროექტი და განისაზღვრა აჭარის ავტონომიური რესპუბლიკის სოციალური პარტნიორობის სამმხრივი ტერიტორიული კომისიის სამუშაო ჯგუფის შემადგენლობა.

საანგარიშო პერიოდის განმავლობაში ჩატარდა სოციალური პარტნიორობის სამმხრივი კომისიის ფარგლებში შექმნილი სამუშაო ჯგუფის 3 შეხვედრა.

2019 წლის 6 თვის მდგომარეობით, გრძელვადიანი საცხოვრებელი უზრუნველყოფილია 960 დევნილი ოჯახი; დახურულია სიცოცხლისათვის ან ჯანმრთელობისათვის მომეტებული საფრთხის შემცველი 5 ობიექტი, საცხოვრებელი დაკმაყოფილდა 70 დევნილი ოჯახი (211 დევნილი); დევნილებისათვის საკუთრებაში გადაცემულია 390 საცხოვრებელი ფართი; დევნილთა ჩასახლების ადგილებში შექმნილი ბინათმესაკუთრეთა ამახანაგობებისათვის საკუთრებაში გადაცემულია 26 ობიექტში განთავსებული საერთო სარგებლობის ფართი (165 ოჯახს); დევნილთა საცხოვრებელი პირობების გაუმჯობესების მიზნით, მათ საკუთრებაში არსებულ 50 ობიექტზე ჩასატარებელი სარემონტო სამუშაოებისთვის გამოყოფილია თანადაფინანსება;

გადაუდებელ შემთხვევაში 4765 იძულებით გადაადგილებული პირისთვის გაწეულია ერთჯერადი ფულადი დახმარება და დროებითი საცხოვრებელი უზრუნველყოფილია 1024 ოჯახი.

2019 წელს „სოციალური რეაბილიტაციისა და ბავშვზე ზრუნვის სახელმწიფო პროგრამის“ მიუსაფარ ბავშვთა თავშესაფრით უზრუნველყოფის ქვეპროგრამის ფარგლებში, დაემატა 2 მობილური ჯგუფი ქ. თბილისსა და ქ. რუსთავში (სულ 2019 წელს - 6 მობილური ჯგუფი); 2019 წლის ივნისის მდგომარეობით, მიუსაფარ ბავშვთა თავშესაფრით უზრუნველყოფის ქვეპროგრამის ფარგლებში, კონტაქტი დამყარდა 216 მიუსაფარ ბავშვთან, მომსახურებით ისარგებლა 210 ბენეფიციარმა, მათ შორის დღის ცენტრით - 153 ბავშვმა, ხოლო თავშესაფრით - 57 არასრულწლოვანმა.

ალტერნატიულ სერვისებში გადაყვანისას, ბავშვების საუკეთესო ინტერესების გათვალისწინებით, ქ. თბილისის ჩვილ ბავშვთა სახლიდან 2019 წელს ბიოლოგიურ ოჯახში

დაბრუნდა 10 ბავშვი, 2019 წლის ივნისის თვის მდგომარეობით თბილისის ჩვილ ბავშვთა სახლში იმყოფებოდა 60 ბავშვი.

6.6 სამოქალაქო უსაფრთხოება

საქართველოს მთავრობასა და უნგრეთის მთავრობას შორის საგანგებო სიტუაციების სფეროში თანამშრომლობის შესახებ შეთანხმებას ხელი მოეწერა 2019 წლის 11 ივნისს.

2019 წლის გაზაფხულზე DG ECHO-სა და UCPM-ის ექსპერტთა შემფასებელი/მრჩეველთა მისია გაეცნო საგანგებო სიტუაციების მართვის სამსახურის ფუნქცია-მოვალეობებს, სამოქალაქო უსაფრთხოების სისტემას, შეაფასა მეხანძრე-მაშველთა სასწავლო ცენტრის შესაძლებლობები. ვიზიტის შედეგად ექსპერტებმა მოამზადეს განვითარების რეკომენდაციები, რომლის საფუძველზეც საგანგებო სიტუაციების მართვის სამსახურმა შეიმუშავა 5 წლიანი ინსტიტუციური განვითარების გეგმა, რომლის დამტკიცება იგეგმება წლის ბოლომდე.

საანგარიშო პერიოდში შემუშავდა 2018 წლის 13 ივლისს კატასტროფების რისკის მართვის სფეროში DG ECHO-სთან გაფორმებული ადმინისტრაციული შეთანხმების შესაბამისი სამოქმედო გეგმა, რომელიც თანხმდება DG ECHO-სთან, რის შემდგომაც მოხდება მისი დამტკიცება.

6.6 ჯანმრთელობის დაცვა

2019 წლის პირველი ნახევრის მდგომარეობით, ცენტრალური აზიისა და აღმოსავლეთ ევროპის ანტიმიკრობული რეზისტენტობის ზედამხედველობის (CAESAR-ის) ქსელში ჩართულია ქვეყნის წამყვანი ოცი მიკრობიოლოგიური ლაბორატორია, რომლებიც ქვეყნის მასშტაბით ახორციელებენ ნოზოკომიური ინფექციების გამომწვევი პათოგენების იდენტიფიცირებას, ასევე ანტიმიკრობული რეზისტენტობის მონაცემთა შეგროვებას, დამუშავებასა და CAESAR ქსელში ინფორმაციის შეტანას. მიკრობიოლოგებს ჩაუტარდათ ტრენინგები EUCAST-ის რეკომენდაციების შესახებ.

საანგარიშო პერიოდში, ქვეყნის მასშტაბით, ოცი სტაციონარული სამედიცინო დაწესებულების სამედიცინო პერსონალს ჩაუტარდა ტრენინგები ანტიბიოტიკების გამოყენების, სამედიცინო მომსახურებასთან ასოცირებული ინფექციების და ანტიმიკრობული რეზისტენტობის ერთმომენტიანი პრევალენტობის კვლევის დიზაინისა და მონაცემთა ანალიზის შესახებ. აგრეთვე, ათ სტაციონარულ სამედიცინო დაწესებულებაში ჩატარდა ანტიბიოტიკების გამოყენების, სამედიცინო მომსახურებასთან ასოცირებული ინფექციების და ანტიმიკრობული რეზისტენტობის ერთმომენტიანი პრევალენტობის პილოტური კვლევა.

2015 წლის მარტში დაიწყო C ჰეპატიტის მართვის სახელმწიფო პროგრამა, რომლის ფარგლებში ხორციელდება C ჰეპატიტით ინფიცირებული პირების გამოვლენა მათი მკურნალობის სქემებში ჩართვის მიზნით. 2019 წლის პირველი ნახევრის მდგომარეობით, C ჰეპატიტზე გამოკვლეულია 500 627 ბენეფიციარი, მათგან საექვო/დადებითი აღმოჩნდა 10432 (მხოლოდ 2,08%).

მომზადდა ევროკავშირის ტვინინგის პროექტი „სისხლის უსაფრთხოების სისტემის გაძლიერება საქართველოში“ და ევროკავშირის წევრი ქვეყნები მოწვეულ იქნენ კონკურსში მონაწილეობის მისაღებად.

2019 წლის მაისში შემუშავდა თამბაქოს კონტროლის ეროვნული სტრატეგიისა და სამოქმედო გეგმის განახლებული ვერსიები, რომლებიც გადაგზავნილია თამბაქოს კონტროლის სახელმწიფო კომისიის წევრ სამინისტროებში განსახილველად. ახალი კანონმდებლობის განხორციელებაზე მუშაობა წარმატებით მიმდინარეობს ჯანმრთელობის ხელშეწყობის სახელმწიფო პროგრამის და სხვა დონორული პროექტების ფარგლებში, რაც მოიცავს მუდმივ მონიტორინგს, ტრენინგებს, ვორკშოპებს, თამბაქოს კონტროლის სხვადასხვა პოლიტიკაზე მუშაობას და კვლევების განხორციელებას.

6.7 თანამშრომლობა ინოვაციის სფეროში

შემუშავდა საქართველოს ინოვაციების სტრატეგიული დოკუმენტის პროექტი.

მიმდინარეობს ბათუმის ინოვაციების ჰაბის სარემონტო სამუშაოები.

455 მეწარმემ გაიარა ტრენინგი ციფრულ წიგნიერებაში (BFD (ფართოზოლოვანი ინტერნეტი განვითარებისთვის) კომპონენტი).

ინოვაციებისა და მეცნიერების პოპულარიზაციისთვის ჩატარდა:

- ✓ ტექნოპარკის ბაზაზე - 62 ღონისძიება ინოვაციების და ტექნოლოგიების სააგენტოს ორგანიზებითა და თანაორგანიზებით, რომელსაც დაახლოებით 3000 ადამიანი დაესწრო;
- ✓ ტელევიზია - 85- მდე გადაცემა;
- ✓ ინტერნეტმედია - 210 - მდე ინტერნეტგამოცემა;
- ✓ ბეჭდვითი მედია - 10-მდე.

ინოვაციური და ტექნოლოგიური პროექტების დაფინანსების ფარგლებში გამოცხადებული ორი 100 000 ლარიანი თანადაფინანსების გრანტის ფარგლებში დაფინანსდა 37 ბენეფიციარი; დამატებით გამოცხადდა 100 000 და 650 000 ლარიანი თანადაფინანსების გრანტები.

მცირე საგრანტო კონკურსის ფარგლებში დაფინანსდა სულ 69 პროექტი. პროტოტიპის მიმართულებით -15, სამგზავრო - 49, ღონისძიების - 5.

მცირე საგრანტო კონკურსის ფარგლებში სამგზავრო გრანტის ხელშეწყობით 49 ბენეფიციარი დაესწრო 28 სხვადასხვა ღონისძიებას, მათ შორის: **Startup Grind Global Conference; Techstars Berlin Accelerator Mentorship, Wolvessummit, Seedsars World Summit, Global Meetup 2019 - Berlin, Creative Business Cup 2019.** ასევე, თანადაფინანსების გრანტების პროექტის პარალელურად, გაეროს ქალთა ორგანიზაციასთან (UN Women) თანამშრომლობით, შემუშავდა პროგრამა და 8 სტარტაპი გაემგზავრება ევროპაში სასწავლო ვიზიტით.

6.8 თანამშრომლობა საინფორმაციო საზოგადოების სფეროში

2002 წლის 7 მარტის ევროპარლამენტისა და საბჭოს 2002/22/EC დირექტივის (უნივერსალური მომსახურების შესახებ) შესაბამისად საკანონმდებლო ცვლილებების შემუშავების მიზნით მომზადდა შესაბამისი სამოქმედო გეგმა.

საქართველოს კანონმდებლობასა და პირადი ცხოვრების კონფიდენციალურობისა და ელექტრონული კომუნიკაციების შესახებ დირექტივას (2002/58/EC), ავტორიზაციის შესახებ დირექტივას (2002/20/EC), დაშვების შესახებ დირექტივასა (2002/19/EC) და ჩარჩო დირექტივას (2009/140/EC) შორის არსებული შეუსაბამოების გათვალისწინებით საქართველოს კანონში „ელექტრონული კომუნიკაციების შესახებ“ მომზადებული ცვლილებების პროექტი გაგზავნილია ევროკომისიაში საბოლოო დასტურისათვის.

6.9 ტურიზმი

სსიპ საქართველოს ტურიზმის ეროვნული ადმინისტრაცია აქტიურად განაგრძობს ევროკავშირის წევრ ქვეყნებში გამართულ საერთაშორისო ტურისტულ გამოფენა-ბაზრობებში მონაწილეობის მიღებას. 2019 წლის პირველ ნახევარში წარმოდგენილი იყო შემდეგ 7 საერთაშორისო ტურისტულ გამოფენა-ბაზრობაში: Ferien-Messe - ვენა, ავსტრია; Vakantiebeurs - უტრეხტი, ნიდერლანდების სამეფო; MATKA - ჰელსინკი, ფინეთი; FITUR - მადრიდი, ესპანეთი; Balttour - რიგა, ლატვია; ITB Berlin - ბერლინი, გერმანია; IMEX Frankfurt - ფრანკფურტი, გერმანია.

საანგარიშო პერიოდში, ასევე აქტიურად ხორციელდებოდა მარკეტინგული კამპანიები ევროკავშირის წევრ ქვეყნებში. სატელევიზიო მარკეტინგული კამპანიები ხორციელდება “Bloomberg Media Group“-თან და CNN-თან თანამშრომლობით. აღნიშნული კამპანიების ფარგლებში, მომზადდა და ასევე მზადების პროცესშია საქართველოს შესახებ ვიდეორგოლები, რომლებიც ტრიალებს სატელევიზიო არხების ეთერში და სხვა მარკეტინგულ მასალასთან ერთად თავსდება შესაბამისი კომპანიების ვებ-გვერდზე საქართველოსადმი მიძღვნილ სპეციალურ ლინკებზე.

საქართველოს ტურიზმის ეროვნული ადმინისტრაცია 2019 წლის 2 კვარტლის განმავლობაში ევროკავშირის წევრი ქვეყნებიდან მასპინძლობდა 30-მდე პრეს და გაცნობით ტურებს, რომლის ფარგლებშიც სულ უმასპინძლა 130-ზე მეტ ჟურნალისტს.

6.10 ხალხთა შორის კონტაქტები, განათლება, მეცნიერება, კულტურა, სპორტი და ახალგაზრდობა

საქართველოს განათლების, მეცნიერების, კულტურისა და სპორტის მინისტრის 2019 წლის 10 აპრილის №69/ნ ბრძანებით დამტკიცდა განახლებული ეროვნული კვალიფიკაციების ჩარჩო და სწავლის სფეროების კლასიფიკატორი.

2019 წლის 29 მაისს გამოიცა საქართველოს განათლების, მეცნიერების, კულტურისა და სპორტის მინისტრის №99/ნ ბრძანება პროფესიული განათლების დამადასტურებელი სახელმწიფო დოკუმენტის – დიპლომის და მისი დანართის ფორმების დამტკიცების შესახებ.

მოკლევადიანი პროფესიული მომზადება-გადამზადების პროგრამების განხორციელებისა და და ფორმალიზების მიზნით, შემუშავდა და დამტკიცდა შესაბამისი სამართლებრივი აქტები: საქართველოს მთავრობის 2019 წლის 15 მარტის N131 დადგენილება; განათლების, მეცნიერების, კულტურისა და სპორტის მინისტრის 2019 წლის 26 მარტის N59/ნ ბრძანება, 2 აპრილის N67/ნ , 10 აპრილის N 71/ნ და 19 აპრილის N498 ბრძანებები.

2019 წლის მაისიდან პროფესიულმა საგანმანათლებლო დაწესებულებებმა პარტნიორ კომპანიებთან ერთად დაიწყეს პროფესიული მომზადება-გადამზადების პროგრამების განხორციელება სამშენებლო და ინფორმაციული ტექნოლოგიების მიმართულებით.

2019 წელს, დამტკიცდა 63 პროფესიული საგანმანათლებლო პროგრამის ჩარჩო დოკუმენტი, რომელიც აერთიანებს 90-მდე პროფესიულ კვალიფიკაციას. ყველა პროფესიული საგანმანათლებლო პროგრამის ჩარჩო დოკუმენტში შესულია ევროპარლამენტისა და საბჭოს მთელი ცხოვრების მანძილზე სწავლის ძირითადი უნარების 8 საკვანძო კომპეტენციის განმავითარებელი მოდულები ან აღნიშნული კომპეტენციები ინტეგრირებულია დარგობრივ პროფესიულ მოდულებში.

დამტკიცდა არაფორმალური განათლების აღიარების მხარდაჭერის პროგრამა, რომლის ფარგლებშიც მოხდება არაფორმალური განათლების აღიარების პროცესის მხარდაჭერა და კოორდინაცია.

დაიწყო ევროკავშირის საბიუჯეტო დახმარების პროგრამის “უნარების განვითარებისა და შრომის ბაზრის მოთხოვნებთან შესაბამისობის” განხორციელება, რომელშიც ჩართულია საქართველოს განათლების, მეცნიერების, კულტურისა და სპორტის სამინისტრო, საქართველოს ეკონომიკისა და მდგრადი განვითარების სამინისტრო და საქართველოს ოკუპირებული ტერიტორიებიდან დევნილთა, შრომის, ჯანმრთელობისა და სოციალური დაცვის სამინისტრო.

განათლების ხარისხის განვითარების ეროვნულმა ცენტრმა საანგარიშო პერიოდში მოიპოვა უმაღლესი განათლების ხარისხის უზრუნველყოფის ევროპული ასოციაციის (ENQA) სრული წევრის სტატუსი, რაც მნიშვნელოვნად შეუწყობს ხელს საქართველოში მინიჭებული კვალიფიკაციებისა და გაცემული დიპლომების თავისუფალ და შეუფერხებელ აღიარებას, საქართველოს უმაღლესი განათლების სისტემისადმი სანდოობის ამაღლებას, საქართველოში მოქმედი უნივერსიტეტების საერთაშორისო პარტნიორობის გაძლიერებას ევროპულ უნივერსიტეტებსა და სამეცნიერო ინსტიტუტებთან და ასევე სტუდენტებისა და პროფესორ-მასწავლებლების საერთაშორისო მობილობას.

შოთა რუსთაველის საქართველოს ეროვნულმა სამეცნიერო ფონდმა დაიწყო ევროკავშირის ინსტიტუციური დაძმობილების პროექტის „ხარისხის უზრუნველყოფისა და კვალიფიკაციების მართვის მიმართულებით შესაძლებლობების გაძლიერება“ განხორციელება.

2019 წლის იანვარ-ივლისის მდგომარეობით, „ჰორიზონტი 2020“ - პროგრამის ფარგლებში გამოცხადებულ კონკურსებში, საქართველოს მონაწილეობით გაკეთებული 287 საპროექტო წინადადებიდან გაიმარჯვა 35-მა პროექტმა, რომლებმაც მიიღეს დაფინანსება ევროკავშირის მხრიდან ჯამში 3,637,140.00 ევროს ოდენობით. 31 პროექტის განხორციელება უკვე დაწყებულია.

ილიას სახელმწიფო უნივერსიტეტმა, მასპინძელი უნივერსიტეტის სტატუსით, მოიპოვა მარი სკლოდოვსკა-კიურის ინდივიდუალური კვლევითი სტიპენდია (individual fellowship) პრესტიჟული გრანტი. „ჰორიზონტი 2020“ - პროგრამაში ასოცირებულ 16 ქვეყანას შორის, აღნიშნული გრანტი მოპოვებული აქვს თურქეთს, საქართველოს და სერბეთს.

შოთა რუსთაველის საქართველოს ეროვნულმა სამეცნიერო ფონდმა დაასრულა მუშობა ინსტიტუციური დაძმობილების პროექტის დოკუმენტზე: „კვლევასა და ინდუსტრიას შორის ინტერ-სექტორული კოლაბორაციის შესაძლებლობების ხელშეწყობა“.

საერთაშორისო კვლევითი თანამშრომლობისა და საქართველოს სამეცნიერო დანიშნულების ქვეყნად გარდაქმნის ხელშეწყობის მიზნით, შოთა რუსთაველის საქართველოს ეროვნულმა სამეცნიერო ფონდმა დაასრულა მუშაობა ევროკომისიასთან საგრანტო შეთანხმებაზე საქართველოს ევროკომისიის პანევროპულ ორგანიზაციაში EURAXESS ჩართვის მიზნით.

2019 წლის პირველი ნახევრის მდგომარეობით, Erasmus+ International Credit Mobility პროგრამით საქართველო მსოფლიოს 141 ქვეყანას შორის მე-6 ადგილზეა. 40-მა საქართველოს მოქალაქემ მიიღო Erasmus Mundus Joint Master Degree Scholarship, რაც აქამდე არსებული ყველაზე უფრო მაღალი მაჩვენებელია - საქართველო შედის მსოფლიოს ქვეყნების პირველ ოცეულში აღნიშნული სტიპენდიების მიხედვით. 2019 წლის პირველი ნახევრის მდგომარეობით, საქართველოდან ევროპაში გასული სტუდენტებისა და პერსონალის რაოდენობა შეადგენს - 1109-ს, საქართველოში შემოსული სტუდენტები და პერსონალის კი, - 699 -ს.

საქართველოში „აღმოსავლეთ პარტნიორობის ევროპული სკოლის“ პირველი ფაზის ფარგლებში ქ.თბილისში, ლისის ტბის მიმდებარედ გამოიყო მიწის ნაკვეთი და ქალაქ თბილისის მერიასთან დასრულდა მშენებლობის ნებართვასთან დაკავშირებული ფორმალობები.

სამინისტრომ დაიწყო თანამშრომლობის ახალი ეტაპი (სამუშაოების მეორე ფაზა) საერთაშორისო ბაკალავრიატის ორგანიზაციასთან „აღმოსავლეთ პარტნიორობის ევროპული სკოლის“ აკრედიტაციის საკითხთან დაკავშირებით. საანგარიშო პერიოდში შეირჩა სტუდენტების მეორე ნაკადი 2019-2020 სასწავლო წლისათვის - 35 საუკეთესო მოსწავლე აღმოსავლეთ პარტნიორობის ქვეყნებიდან.

„ევროპული სკოლის საზაფხულო ბანაკი 2018-2020“ პროექტის ფარგლებში, 2019 წლის საზაფხულო ბანაკში (16-30 აგვისტოს პერიოდში) ჩაერთო 100 ახალგაზრდა შემდეგი ქვეყნებიდან: აზერბაიჯანი, ბელარუსი, სომხეთი, უკრაინა, ბულგარეთი, ჩეხეთის რესპუბლიკა, ირლანდია, ლატვია, პოლონეთი, დიდი ბრიტანეთისა და ჩრდილოეთ ირლანდიის გაერთიანებული სამეფო და საქართველო.

პროგრამა „eTwinning plus“-ის ონლაინ სისტემას 2019 წლის აპრილში შეუერთდა 230 მასწავლებელი 173 სკოლიდან. ივნისის მონაცემებით, პორტალზე აქტიურია 131 პროექტი, სადაც ქართველი მასწავლებლები მონაწილეობენ. ჯამში, პროგრამაში რეგისტრირებულია 1100 მასწავლებელი, 650 სკოლიდან.

2019 წლის მარტიდან საქართველოს განათლების, მეცნიერების, კულტურისა და სპორტის სამინისტრო “პოლონეთის რესპუბლიკის ახალგაზრდული საბჭოების განვითარების ასოციაციასა” - და „ლიეტუვის ახალგაზრდულ საქმეთა კოორდინატორთა ეროვნულ ასოციაციასთან“ - პარტნიორობით ახორციელებს ევროკავშირის „Erasmus+“-ის პროგრამის საგრანტო კონკურსში გამარჯვებულ პროექტს „საქართველოში ახალგაზრდული პოლიტიკის განვითარების ხელშეწყობა მუნიციპალურ დონეზე“. პროექტი მიზნად ისახავს საქართველოს ექვს მუნიციპალიტეტში - თელავი, გურჯაანი, ბაღდათი, ზესტაფონი, ახალციხე, ადიგენი - ადგილობრივი ახალგაზრდული საქმიანობის განვითარების და ახალგაზრდების გადაწყვეტილებების მიღების პროცესში ჩართვის ხელშეწყობას.

საანგარიშო პერიოდში, შემუშავდა შემოქმედებითი ინდუსტრიების მრავალფუნქციური ვებ-პლატფორმის ოთხივე კომპონენტის (საინფორმაციო გვერდი, სოციალური ქსელი - დაკავშირდი, მონაცემთა ბაზა და ვებ-ინკუბატორი) ტექნიკური დოკუმენტი. გაიწერა ტექნიკური და შინაარსობრივი ნაწილის ძირითადი მახასიათებლები, ფუნქციები, სტრუქტურა და ჩარჩო. ასევე, მომზადდა ელექტრონული სისტემის უსაფრთხოების კომპონენტი.

საქართველოს ბუნებრივი და კულტურული მემკვიდრეობის კოდექსის პროექტი დასრულების ფაზაშია; საჭიროებს კონსოლიდაციას. წლის ბოლომდე წარდგენილი იქნება პარლამენტში დასამტკიცებლად.

ევროკავშირის პროგრამის „შემოქმედებითი ევროპა“ ფარგლებში გაიმართა 6 საინფორმაციო შეხვედრა, რომელსაც დაესწრო 200-მდე ადამიანი. 2019 წლის იანვარ-ივლისის პერიოდში პროგრამის ფარგლებში საქართველოს მონაწილეობის სტატისტიკა არის შემდეგი: ქვეპროგრამა მედია: 4 წარდგენილი პროექტი საქართველოს მონაწილეობით - 1 წარმატებული (CineDoc Tbilisi International Film Festival); ქვეპროგრამა კულტურა: 6 წარდგენილი პროექტი საქართველოს მონაწილეობით - 3 წარმატებული (Vaso Abashidze Music and Drama State Theatre; One Caucasus; Georgian Arts and Culture Center).

შემუშავებულია „ფიზიკური აღზრდისა და სპორტის შესახებ“ საქართველოს კანონის პროექტი. 2019 წლის პირველ ნახევარში პროექტი შეთანხმებულ იქნა საქართველოს განათლების,

მეცნიერების კულტურისა და სპორტის სამინისტროს სტრუქტურულ ერთეულებთან, ასევე, საქართველოს პარლამენტის მიერ მომზადდა რეგულირების ზეგავლენის შეფასების ანგარიში, დასრულების ეტაპზეა ჩართულ მხარეებთან შეთანხმების პროცესი.

სრულდება „მასობრივი სპორტის ხელმისაწვდომობისა და განვითარების სტრატეგიის“ პროექტის შემუშავება. დაწყებულია მუშაობა სამოქმედო გეგმაზე. შეიქმნა სამოქმედო გეგმის პირველი პროექტი. ასევე, მიმდინარეობს TAIEX ინსტრუმენტით გათვალისწინებული ღონისძიების - ექსპერტთა მისიის დაგეგმვა.

6.11 რეგიონული განვითარება

"2018-2021 წლების საქართველოს რეგიონული განვითარების პროგრამის" განხორციელების მხარდაჭერის მონიტორინგის ქმედითი სისტემის დანერგვით - მომზადდა რეგიონული განვითარების 2018-2021 წლების პროგრამის 2018 წლის განხორციელების კონსოლიდირებული ანგარიში, რომელიც საბოლოო დაზუსტებების შემდგომ აიტვირთება სამინისტროს ელექტრონულ გვერდზე.

დასრულების ეტაპზეა 2020-2022 წლების საქართველოს საპილოტე რეგიონების (4 რეგიონი) განვითარების პროგრამული დავალების დოკუმენტის მომზადება, რომელიც საბოლოო დაზუსტებების შემდგომ აიტვირთება სამინისტროს ელექტრონულ გვერდზე.

7. ფინანსური დახმარება, თაღლითობის წინააღმდეგ ბრძოლა და კონტროლი

სახელმწიფო უწყებებთან აქტიური კონსულტაციების საფუძველზე, საქართველოში ევროკავშირის წარმომადგენლობასთან ერთად იდენტიფიცირებულ იქნა ევროკავშირის დახმარების 2019 წლის სამოქმედო გეგმის შემდეგი პრიორიტეტები: ადამიანის უფლებების დაცვა, რეგიონული განვითარება, სოფლის მეურნეობა.

2019 წლის 11 ივლისს, ბათუმის საერთაშორისო კონფერენციის ფარგლებში ხელი მოეწერა საქართველოსა და ევროკავშირის შორის ორ საფინანსო შეთანხმებას (ევროკავშირის დახმარების 2018 წლის სამოქმედო გეგმით გათვალისწინებული დახმარების პროგრამების საფინანსო შეთანხმებები "უსაფრთხოებისა და კანონის უზენაესობის გაძლიერება" და "ეკონომიკური მმართველობისა და ფისკალური პოლიტიკის მხარდაჭერა") რომლის ფარგლებში საქართველო ევროკავშირისგან 47 მილიონამდე ევროს ოდენობის ფინანსურ დახმარებას მიიღებს.

2019 წლის 1 მარტს გამართულ საქართველოს ევროკავშირში ინტეგრაციის კომისიის სხდომაზე, მიღებულ იქნა გადაწყვეტილება საქართველოში ევროკავშირის ფინანსური დახმარების განხორციელების პროცესში თაღლითობის წინააღმდეგ ბრძოლისა და კონტროლის კოორდინაციისა და მონიტორინგის სამუშაო ჯგუფის ჩამოყალიბების თაობაზე. ევროპული ქვეყნების გამოცდილების შესწავლისა და ექსპერტების რეკომენდაციების შესაბამისად, განისაზღვრა სამუშაო ჯგუფის შემდეგი შემადგენლობა: გენერალური პროკურატურა, იუსტიციის სამინისტრო, საგარეო საქმეთა სამინისტრო, ფინანსთა სამინისტროს საგამომიებო

სამსახური, სახელმწიფო უსაფრთხოების სამსახური და სახელმწიფო აუდიტის სამსახური. სამუშაო ჯგუფის პირველი შეხვედრა გაიმართა 2019 წლის 30 აპრილს.

2019 წლის 27 ივნისს, გაიმართა ვიდეო-კონფერენცია ევროკავშირის თაღლითობის წინააღმდეგ ბრძოლის ოფისისა (OLAF) და საქართველოში ევროკავშირის ფინანსური ინტერესების დაცვის მიზნით შექმნილი სამუშაო ჯგუფის წარმომადგენლების მონაწილეობით. ვიდეო-კონფერენციაზე განხილულ იქნა ასოცირების შეთანხმების ვალდებულების შესაბამისად, „ევროპის გაერთიანების ფინანსური ინტერესების დაცვის შესახებ“ ევროკავშირის კონვენციისა და აღნიშნული კონვენციის ოქმების დებულებებთან საქართველოს კანონმდებლობის აპროქსიმაციის კუთხით არსებული მდგომარეობა.

8. ინსტიტუციური თანამშრომლობა

8.1 ინსტიტუციური ჩარჩო

5 მარტს ქ. ბრიუსელში, გაიმართა საქართველო-ევროკავშირის **ასოცირების საბჭოს რიგით მე-5 სხდომა**. შეხვედრაზე მხარეები მიესალმნენ ევროკავშირსა და საქართველოს შორის წარმატებულ თანამშრომლობას და კიდევ ერთხელ დაადასტურეს მზაობა, ხელი შეუწყონ ევროკავშირთან საქართველოს უფრო ღრმა პოლიტიკური ასოცირებასა და ეკონომიკურ ინტეგრაციას. ორივე მხარემ აღიარა საქართველოს ევროპული მისწრაფებები, ევროპული არჩევანი და საერთო მიზანი, გააგრძელოს დემოკრატიული, სტაბილური და წარმატებული ქვეყნის მშენებლობა. ასოცირების საბჭომ ცნობად მიიღო **საქართველოს ევროკავშირში ინტეგრაციის საგზაო რუკა (RoadMap2EU)**, რომელიც მიზნად ისახავს საქართველო-ევროკავშირის ასოცირების შეთანხმების ფარგლებში არსებული რეფორმების კონსოლიდაციას, მომავალი გეგმების განსაზღვრას და მათ შორის ასოცირების მიღმა ევროკავშირთან ამბიციური ინტეგრაციის მიზნით ღონისძიებების დასახვას.

2019 წლის 28 მარტს სტრასბურგში გაიმართა **ევროკავშირი-საქართველოს ასოცირების საპარლამენტო კომიტეტის მორიგი სხდომა**, სადაც სხვა საკითხებთან ერთად განხილულ იქნა ოკუპირებულ ტერიტორიებზე არსებული გამოწვევები და საქართველოს სამშვიდობო პოლიტიკა. ევროპარლამენტარებმა მხარდაჭერა გამოხატეს საქართველოს მთავრობის სამშვიდობო ინიციატივისადმი "ნაბიჯი უკეთესი მომავლისკენ".

2019 წლის 23 მაისს, ქ. თბილისში გაიმართა **ადამიანის უფლებების დაცვის საკითხებზე საქართველო-ევროკავშირის დიალოგის რიგით მე-12 შეხვედრა**. შეხვედრაზე მხარეებმა მიმოიხილეს საქართველოში ადამიანის უფლებათა დაცვის კუთხით, დიალოგის 2018 წლის 25 აპრილს გამართული შეხვედრის შემდგომ პერიოდში გატარებული ღონისძიებები. ევროკავშირის წარმომადგენლებმა დადებითად შეაფასეს ამ კუთხით საქართველოს მიერ მიღწეული პროგრესი მთელი რიგი მიმართულებებით, მათ შორის, ადამიანის უფლებათა

დაცვის ეროვნული მექანიზმების გაძლიერების, ადამიანის უფლებათა სტრატეგიისა და მისი სამოქმედო გეგმის იმპლემენტაციის, ანტი-დისკრიმინაციული პოლიტიკისა და უმცირესობათა უფლებების დაცვის, გენდერული თანასწორობის უზრუნველყოფის, ქალთა წინააღმდეგ ძალადობასთან ბრძოლის, ბავშვთა უფლებების დაცვის, შრომითი უფლებების უზრუნველყოფის, ასევე წამებისა და არაადამიანური მოპყრობის აღკვეთის კუთხით. განსაკუთრებული ყურადღება დაეთმო საქართველოს ოკუპირებულ რეგიონებში ადამიანის უფლებების მხრივ არსებულ მძიმე ვითარებას. შეხვედრის ბოლოს მხარეების მიერ მიღებული იქნა ერთობლივი პრეს-რელიზი.

18 ივნისს ქ. თბილისში საქართველო-ევროკავშირის ასოცირების კომიტეტის მეხუთე სხდომა გაიმართა. სხდომაზე მხარეებმა მიმოიხილეს ასოცირების შეთანხმების შესაბამისად ქვეყანაში მიმდინარე რეფორმები. კომიტეტზე განხილულ იქნა საქართველოს ოკუპირებულ ტერიტორიებზე არსებული ვითარება და ევროკავშირის ჩართულობა რუსეთ-საქართველოს კონფლიქტის მშვიდობიანი გადაწყვეტის პროცესში, ასევე მხარეებს შორის თანამშრომლობის განვითარების შესაძლებლობები უსაფრთხოებისა და თავდაცვის სფეროში. შეხვედრისას განხილულ იქნა საქართველოში ევროკავშირის მიმდინარე, ასევე დაგეგმილი დახმარების პროგრამები. სხდომაზე მხარეებმა მიმოიხილეს ეკონომიკური და სექტორული თანამშრომლობის საკითხები. ევროკავშირმა დადებითად შეაფასა საქართველოს მიერ ასოცირების შეთანხმებით გათვალისწინებული ვალდებულებების შესრულების მიმდინარეობა, განსაკუთრებით ევროკავშირის კანონმდებლობასთან დაახლოების კუთხით.

საანგარიშო პერიოდში გაიმართა ეკონომიკური და დარგობრივი თანამშრომლობის 5 თემატური ჯგუფის შეხვედრა:

- 2019 წლის 21 თებერვალს, ქ. ბრიუსელში გაიმართა მე-6 თემატური ჯგუფის - „დასაქმება, სოციალური პოლიტიკა და თანაბარი შესაძლებლობები; საზოგადოებრივი ჯანდაცვა“ - რიგით მეოთხე სხდომა;
- 2019 წლის 3 აპრილს, ქ. თბილისში გაიმართა მე-5 თემატური ჯგუფის - „სოფლის მეურნეობა და სასოფლო განვითარება; მეთევზეობა და საზღვაო მმართველობა; რეგიონული განვითარება, თანამშრომლობა საზღვრისპირა და რეგიონულ დონეზე“ - რიგით მეოთხე სხდომა;
- 2019 წლის 4 აპრილს, ქ. თბილისში გაიმართა მე-4 თემატური ჯგუფის - „თანამშრომლობა საინფორმაციო საზოგადოების სფეროში; თანამშრომლობა აუდიოვიზუალურ და მედიის სფეროებში; თანამშრომლობა კვლევის, ტექნოლოგიების განვითარებისა და დემონსტრირების სფეროში; განათლება, ტრენინგი და ახალგაზრდობა; კულტურის სფეროში თანამშრომლობა; თანამშრომლობა სპორტისა და ფიზიკური აქტივობის სფეროში“ - რიგით მეოთხე სხდომა;
- 2019 წლის 13 მაისს ქ. თბილისში გაიმართა საქართველო-ევროკავშირის ასოცირების ეკონომიკური და დარგობრივი თანამშრომლობის ქვეკომიტეტის პირველი თემატური

ჯგუფის - „ეკონომიკური დიალოგი, საჯარო ფინანსების მართვა და ფინანსური კონტროლი; სტატისტიკა; ფინანსური მომსახურება; ბუღალტრული აღრიცხვა და აუდიტი; თაღლითობის წინააღმდეგ ბრძოლა და კონტროლი“ რიგით მეოთხე სხდომა;

- 2019 წლის 5 ივნისს, ქ. თბილისში გაიმართა: მე-2 თემატური ჯგუფის - „სამრეწველო და საწარმოების პოლიტიკა და სამთო-მოპოვებითი საქმიანობა; ტურიზმი; კორპორაციული სამართალი და კორპორაციული მმართველობა; მომხმარებელთა პოლიტიკა; საგადასახადო პოლიტიკა“ - რიგით მესამე სხდომა;

8.2 სტრატეგიული კომუნიკაცია

საანგარიშო პერიოდში მიმდინარეობდა მუშაობა „2017-2020 წლებისთვის ევროკავშირსა და ნატოში საქართველოს გაწევრიანების კომუნიკაციის შესახებ საქართველოს მთავრობის სტრატეგიის“ 2019 წლის სამოქედო გეგმის 6 თვის ანგარიშის მომზადებაზე.

2019 წლის პირველი 6 თვის პერიოდში საგარეო საქმეთა სამინისტროს სსიპ-ის "საინფორმაციო ცენტრი ნატოსა და ევროკავშირის შესახებ" ორგანიზებით, საქართველოსა და ევროკავშირის შორის უფიზო მიმოსვლის წესების და უფლებების შესახებ 18 საინფორმაციო შეხვედრა გაიმართა. შედეგად, 3 950-მდე ადამიანმა პირდაპირი კომუნიკაციის გზით მიიღო ინფორმაცია. საინფორმაციო კამპანია 2018 წლის მარტიდან დაიწყო და საქართველოს ყველა რეგიონში ეტაპობრივად ხორციელდება.

ყოველწლიური ღონისძიებათა ციკლი „ევროპის დღეები“ 2019 წელს მეშვიდედ ჩატარდა. საგარეო საქმეთა სამინისტრომ და საინფორმაციო ცენტრმა ნატოსა და ევროკავშირის შესახებ 5-25 მაისს ქ. თბილისსა და საქართველოს სხვადასხვა რეგიონში 100-მდე ღონისძიება გამართა. ღონისძიებები აღმოსავლეთ პარტნიორობის 10 წლის იუბილეს ეძღვნებოდა და შესაბამისად, ყურადღება გამახვილდა იმ ხელშესახებ ახალ შესაძლებლობებზე, რაც თანამშრომლობამ განაპირობა. ღონისძიებებს 11 306 ადამიანი დაესწრო.

2019 წლის 11-12 ივლისს „აღმოსავლეთ პარტნიორობის“ 10 წლის იუბილესადმი მიძღვნილი ბათუმის მე-16 საერთაშორისო კონფერენცია - "საქართველოს ევროპული გზა" გაიმართა. კონფერენცია უპრეცედენტო იყო თავის მასშტაბით და მასში 600-მდე სტუმარი იღებდა მონაწილეობას. კონფერენციის მონაწილეები განიხილავდნენ ევროკავშირის და აღმოსავლეთ პარტნიორი ქვეყნების საერთო გამოწვევებს. ღონისძიებაში მონაწილეობდნენ, როგორც ევროკავშირის, ასევე პარტნიორი ქვეყნების მაღალი თანამდებობის პირები, აკადემიური წრეების, არასამთავრობო სექტორისა და ბიზნესის წარმომადგენლები.

8.3 სამოქალაქო საზოგადოებასთან თანამშრომლობა

ასოცირების შესახებ შეთანხმებისა და ასოცირების დღის წესრიგის განხორციელების 2019 წლის სამოქმედო გეგმისა და 'საგზაო რუკის' შემუშავების პროცესში აქტიურად იყვნენ ჩართულნი „აღმოსავლეთ პარტნიორობის“ სამოქალაქო საზოგადოების ფორუმის საქართველოს ეროვნული

პლატფორმის წევრი არასამთავრობო ორგანიზაციებისა და ფონდი „ღია საზოგადოება საქართველოს“ ასოცირების შესახებ შეთანხმების განხორციელების მონიტორინგის ჯგუფის წარმომადგენლები. მათ მიერ წარმოდგენილი რეკომენდაციების მნიშვნელოვანი ნაწილი გათვალისწინებულ იქნა 2019 წლის ეროვნულ სამოქმედო გეგმაში.

29 მარტს ქ. თბილისში სასტუმროში „ჰოთელს & პრეფერენს ჰუალინგ თბილისი“ გაიმართა მაღალი დონის კონფერენცია „ახლოს ხალხთან – უფრო ძლიერი სამოქალაქო საზოგადოება“. აღნიშნული კონფერენცია იმართება წელიწადში ერთხელ. მის ჩატარებას საქართველოს მთავრობასა და „აღმოსავლეთ პარტნიორობის“ სამოქალაქო საზოგადოების ფორუმის საქართველოს ეროვნულ პლატფორმას შორის, 2015 წლის 13 ნოემბერს გაფორმებული თანამშრომლობის შესახებ მემორანდუმი ითვალისწინებს.

აგვისტოს თვეში გაიმართა შეხვედრები აღმოსავლეთ პარტნიორობის სამოქალაქო საზოგადოების ეროვნულ პლატფორმასა და საქართველოს საჯარო მოხელეებს შორის საპენსიო რეფორმისა და საგანგებო სიტუაციების მართვის თემატიკასთან დაკავშირებით.